



# Wantok

K1 tasol

Namba 2104 Januəri 8 - 14, 2015 28pes

Niuspepa Bilong Yumi Ol PNG Stret!

The Catholic Reporter

Isu bilong Januəri 2015 i stap insait!!

# Gavman kamapim nupela pawa lo

Yakam Kelo i raitim

**MINISTA** bilong Pablik Entaprais na Stet Invesmen Ben Micah i gat pawa nau long karimaut olgeta ilektrisiti sevis (pawa saplai) insait long kantri long tupela mun aninit long nupela emejensi program gavman bin kamapim long Disemba 22, 2014. Dispela em wok bilong PNG Pawa tasol nau

em Minista bai go pas long karimaut.

Taim gavman bin kamapim dispela senis, ol i tokaut long Stet ov Emejensi (SOE) aninit long lo bilong Isensel Sevis Ekt 2002 long olgeta wok bilong pawa saplai na sevis insait long kantri.

Antap long dispela Mista Micah i makim olpela Sif ov Staf bilong PNG Difens Fos, Kepten Tom ur olsem Eme-

jensi Kontrola na Teika Tefatu olsem Deputi Kontrola.

Nesenel Eksekutiv Kaunsel (NEC) i makim wanpela edvaisori komiti we Seketeri bilong Dipatmen ov Pablik Entaprais na Stet Invesmen Dokta Clement Waine go pas olsem siaman na membas olsem Paul Nerau, Lary Andagali, Isaac Lupari na Dairi Vele i stap long givim stia tingting na edvais long Minista Micah.

Mista Micah i tokaut olsem dispela senis em bilong kamapim sampela gutpela senis long PNG Power Limited kampani na lukim sapos em ken mekim mani bikos nau yet em planti mani i lus nating long ol bisnis na pablik save hait na pulim pawa nating.

Mista Micah i tok pawa saplai sevis bin go daun tru long ol yia i kam olsem na gavman mas stretim ol wok na lo bilong em long sapotim dispela sevis insait long kantri.

Em i tok pawa em bun tru bilong kantri long ron gut we politiks, tred, komes, indastri, edukesen, helt, lo na oda, difens na sekyuriti, ovasis sapot na bisnis, spot na olgeta arapela save ron gut antap long gutpela na stretpela pawa saplai.

PNG nau i wok long go insait long ol bikipela senis bilong bisnis na ekonomi wankain olsem ol bikipela kantri long wol. Olsem na gutpela pawa saplai sevis em bikipela samting.

Em tok sapos planti manmeri bilong Papua Niugini i no inap kisim gutpela pawa saplai bihain long 38 krismas bilong independens long kantri, dispela em sem pasin na krangi pasin tru egensim ol pipel bilong yumi.

Dispela yia bai PNG i lukautim bikipela pilai bilong Pasifik Gems long mun Julai na bikipela intanesnel miting bilong APEC long 2018 we i stat pinis long las yia na bai go het yet inap long 2018

long PNG. Bai yumi lukautim planti bikipela bikipela miting na ol pilai long bihain taim olsem na yumi mas stretim gut ol pawa sevis bilong yumi, em i tok.

Minista Micah i tokaut olsem em bin toktok wantaim Komisina bilong Polis na Komanda bilong PNG Difens Fos na ol bai wok klostu wantaim edvaisori grup we kabinet bin makim pinis.

Ol pawa bilong Minista em: Stopim olgeta ovasis raun bilong PNG Power inap minista tok orait

Olgeta konsalten na advaisa long wok bilong pawa na ilektrisiti i pinis nau.

Givim 48 auas (tupela de) long olgeta lain husat save hait na stilim pawa long ripot long PNG Power nau ol bai katim pawa bilong ol, sasim na kalabusim ol.

Tokim edvaisori komiti long stretim gen pawa bil

Stopim olgeta IPP projek na bai ol putim nupela IPP long tenda

Tokim edvaisori komiti long kamapim gutpela rot bilong peim pawa bil na kisim pawa bil long ol lain husat i no bin baim pawa bil longpela taim i kam olsem ol gavman dipatmen na opis na ol sampela kampani na bisnis na ol haus lain.

Ol skul na haus sik bai i gat luksave insait long dispela nupela emejensi lo tasol olgeta arapela mas kam nau na peim ol bils bilong ol o bai ol kisim taim long lo, Mista Micah i tok.

## INSAIT

NPCP kisim sea bilong Oil Search



Pes 3

Nupela kumu saplai projek bilong Purari

Pes 6

Polye singaut gen long gavman daunim 2015 mani plen - P8



## BISNIS nius

Gavman i mas givim bikipela luksave long egrikalsa - Pes 21



NUPELA STAIL BASKET: (L-R na Baksait i kam long fran) Soina, Kirsty, Ebony, Bianca na Darrel em ol liklik pikinini bilong ples Monoitu, Siwai long Sautwes Bogenvil insait long Atonomes Rijen bilong Bogenvil i amamas long soim nupela na naispela stail basket we ol meri i wok long yusim long putim ol samting long en. I gat ol kain sais na pe bilong ol long K10 mak i go antap. Poto: Veronica Hatutasi

## DEBT

# Is the weight too much?

Transfer your balance and we will pay off your DEBT.

- ✓ Low Interest @1% p.m
- ✓ Suitable Terms & Conditions
- ✓ Flexible Repayment Terms
- ✓ Accessible
- ✓ Affordable

watch your savings grow



# 2015 bai gat salens long PNG

**PRAIM Minista Peter O'Neill i redi long ol salens bilong nupela yia.**

"Dispela yia, 2015 bai makim 40 krismas bilong indipendens long kantri, na bai gat sans long glasim ol samting na go yet long ol senis i kamap," PM O'Neill i tok.

"Kantri bilong yumi bai holim bikpela Pasifik Gems, na mipela bai go pas long holim Pasifik Ailans Lidas Forum na tu, welkamim planti APEC bikman taim mipela i redi long holim APEC Presiden na Praim Minista bung long 2018.

Praim Minsta i tok lukluk bilong gavman bai stap yet long ol hap bilong polisi we em bin promis long ol pipel long 2012 ileksen, taim ol menesim global ikonmik wari bilong PNG.



PRAIM Minista Peter O'Neill

"Olsem gavman mipela bai go yet long luksave long 4-pela bikpela hap bilong fri edukesen bilong ol pikinini, yunivesel heltke, wokim gut lo na oda long kantri na karim aut ol bikpela wok.

Bai gat ol salens olsem ol bikpela ikonmik long wol i painim, tasol mipela i wok

long givim tingting long ol pipel na bisnis long ol dispela hevi.

Long wankain taim, prais bilong oil i go daun, tasol em i no inap kamapim hevi long LNG revenyu long wanem, mipela i putim ol kontrak i stap long fiks prais.

Domestik ikonmik bilong mipela i stap strong wantaim planti projek i kamap na em i kamapim planti wok long kantri.

Dispela infrastraksa program em long kampim ikonmik bilong yumi na wokim bisnis na wok bihain taim. Ol projek olsem nupela rot, bris na sip bris, ol kolis bilong tisa na ol narapela skul, na ol haus sik bai kamap long dispela nupela yia, 2015.

Mipela i wokim planti nupela haus bai pinis long

2015 tu. Dispela bai givim planti ol famili long gat haus bilong ol yet insait long wanpela namba wan pesonal haus lon long wol.

Mipela i tokim ol pipel long ol provins, distrik na viles long yusim gut ol gavman risos.

Ikonmik bilong kantri i stap olsem 8 pesen long wanpela krismas na dispela mak bai stap yet.

Inflesen o strong bilong kina i stap olsem yet, mak bilong intres tu, foren risev bilong mipela i stap antap stret wantaim inap i stap olsem risev long karamapim 6-pela mun bilong impot, na level bilong wok i go antap yet".

Ikonmik bilong PNG i stap orait. Praim Minista i tok seif na prosperes nu yia long ol pablik na long, ol memba bilong palamen.

## Wokman-meri long PNG i amamas long gavman i helpim wantaim haus

PLANTI wokman-meri long Papua Niugini i amamas na sapotim tingting bilong gavman long helpim ol i bildim ol haus bilong ol PNG Gavman bai makim planti hap graun long Pot Mosbi na Lae long ol wok-

lain bai wokim haus long en. Donnath Malawae, em kodineta bilong ol fiseris woklain wantaim PNG Waterside na Maritime Union i tok olsem bihain long Praim Minista, Peter O'Neill, i tok long givim

samting olsem 2000 ol hap graun long Mosbi na Lae we ol wokman-meri i ken bildim ol haus bilong ol long en.

PNG i gat bikpela wari long haus o em i sot tru long ol haus, na planti woklain i save stap long ol

setelmen long dispela tupela bikpela siti.

Praim Minista O'Neill i bin tok tu olsem bai ol i statim dispela wok long Lae na Mosbi, tasol bai ol i surukim tu i go long ol narapela taun long kantri.

## Australia kamapim gutpela sefti long Bogenvil

Australia Minista bilong Foren Afeas, Julie Bishop i bin opim wanpela nupela polis bareks long Atonomas Rijon bilong Bogenvil taim em i bin go raun lukluk long hap klostu long pinis bilong las yia.

Ol nupela bareks bai helpim Bogenvil Polis Sevis long inapim gol mak bilong en long kisim moa long 100 moa polis opisa inap long yia 2016.

Dispela bareks em i bilong man na meri na em bai inap long kisim 40 Bogenvil man na meri long go insait long pri-rekrut trening long Polis Trening Senta long Buka long dispela yia.

Dispela helpim i kam long Australia long helpim wok bilong lo na oda na jastis long Bogenvil.

Em i bilong stretim ol haus i bagarap long dispela trening senta, na tu long wokim nupela haus na ol hap bilong trenim ol polis na loya, na bai sapotim ol wok bilong stretim lo na oda hevi long ples.

"I mas gat gutpela Polis sevis long Bogenvil long



Minista Julie Bishop i lukluk long ol Bogenvil Polis Sevis.

givim gutpela sekyuriti na lo na oda long holim strong wok bilong pis o bel isi, demokrasi na developmen long Bogenvil." Mis Bishop i tok.

"Mi amamas long lukim

olsem i gat 16 meri lo na oda opisa husat ol komyniti bilong ol i makim ol long kisim pri-rikrut trening long helpim pis developmen long Atonomas Rijon.

Sapos oli winim skul trening bilong ol, ol dispela trening lain bai inap long go insait long polis sevis olsem nupela rikrut." Em i tok.

## Kiunga Polis i gat hevi long haus

OL polisman na poliseri husat i wok long Kiunga taun na long ol narapela hap bilong Westen Provins i gat problem yet long haus bilong slip.

Wanpela senia polisman husat i no laik autim nem bilong en i tok em yet i bin stap 5-pela yia nau long Kiunga na em i no lukim wanpela senis i kamap long stretim sindaun bilong ol polis long hap.

Em i tok, planti polis opisa husat i kamaut nau tasol long koles long Bomana nau i save stap wantaim ol famili bilong ol long ol rent haus na ol i save go mekim wok bilong ol.

Em i tok, wanpela stori bilong 7-pela nupela polisman na meri i bin go long Balimo na i stap long hap tasol i no gat haus olsem na 4-pela bilong ol i lusim Balimo na lusim 3-pela tasol i stap yet long hap.

Em i tok olsem, Kiunga Polis Bareks em i bin kamap long taim bipo olsem na olgeta haus i bagarap olgeta, na sam-pela ol polis opisa i yusim ol mani bilong ol yet.

"Mipela bai wok olsem wanem sapos mipela i no slip gut long gutpela haus?" em i tok.

Em i tok strong long gavman i mas lukluk long dispela hevi na stretim hariap. Em i tok, Westen Provinsel Gavman i mas lukluk na putim sampela mani long kirapim nupela Polis Bareks na Polis Haus bai ol polis opisa i mas stap bung wantaim long wanpela hap tasol. Dispela bai mekim ol i go hariap long ol wok taim hevi i kamap.

Planti developmen i wok long kamap insait long provins olsem long Not Flai Distrik, olsem na ol polis i mas kisim gutpela lukaut na bai ol i ken mekim gut wok bilong ol long daunim ol bikhet pasin na hevi long distrik.

Em i tok Kiunga taun tu i nidim planti Polis opisa long wok-about raun long olgeta hap bilong Westen Provins.

## Vailens agensim ol meri long Krismas na Nu Yia



VAILENS o pasin bilong paitim na mekim no gut long ol meri na pikinini long Papua New Guinea (PNG) long taim bilong selebresen long Krismas na Nu Yia i stap yet olsem wanpela bikpela wari.

Philma Kelagai, husat i bin statim Leniata Legacy, wanpela sariti grup long Australia bilong makim Kepari Leniata, meri ol i bin kukim long paia na kilim dai long hailans, i tok olsem em i no kirap no gut long mak bilong vailans egensim ol meri na pikinini long taim bilong Krismas na Niu Yia.

Philma Kelagai, husat i bin statim Leniata Legacy, wanpela grup long Australia, i save mekim awenes long stopim vailens egensim ol meri long PNG.

Em i mekim dispela toktok bihainim ol media ripot long PNG we ol i sutim tok long ol polis i sutim dai wanpela yangpela mama long Lae, long Nu Yia nait.

Toktok blong en i bihainim tu ol ripot olsem planti mama na ol pikinini i bin kisim taim long Krismas na Nu Yia long Mosbi



# PNG Semba bilong Main i tok winmani bilong LNG bai pundaun

## Stanley Nondol i raitim

PNG Semba bilong Mains na Petroleum i tok prais bilong oil long wol maket i pundaun na winmani bilong PNG LNG ges tu bai i kam daun.

Wanpela ripot bilong samba i kam aut long las mun i tok prais bilong oil i bin stap long US 115 dola long wan wan barel na i pundaun kam daun long US 60 dola long wan wan barel.

Ripot i tok prais bilong ol mineral olsem, gol, kopa, nikel i pundaun tu long las tupela yia na i no go antap

yet. Prais bilong gol i stap long US1,800 na kam daun long US1,200 long wan wan auns. Na kopa i stap long US 4,500 na kam daun long US3,000 long wan wan auns.

Dispela pundaun bilong prais long wol maket i kamap mak nogut bilong ol sampela mineral eksplorse- sen long PNG.

Semba i tok prais bilong oil long wol maket i pundaun na winmani bilong PNG LNG long takis gavman i lukluk na tokaut long kisim long takis long LNG long

2015 baset tu bai pundaun.

Ripot i tok ol investa long maining na eneji stok bai tingting planti long ol senis bilong mineral na oil prais i kamap long wol maket.

Ripot i tok moa olsem bikpela kampani bilong oil na ges long PNG, Oil Search tu lukim prais long sea bilong en i stap antap long \$A9.50 i kam daun long \$A6.87 tasol nau go antap liklik long \$A7.6. Na prais bilong sea bilong Santos, Join Vensa kampani bilong LNG tu i pundaun long A\$15 i kam daun long A\$8 long wan wan sea.

Plantu tokpait i kamap namel long

gavman, oposisen na ol saveman bilong ol wok risets long pundaun bilong prais bilong oil long wol maket.

Oposisen i singaut long gavman long daunim mani plen bilong 2015 bikos LNG bai no inap mekim inap winmani long 2015.

Institut bilong Nesenel Afeas tu i tok LNG winmani bai kam daun na, gavman i mas daunim mani plen na i no ken kisim dinau long kantri bai bekim bihain.

Gavman i strongim 2015 mani plen na i tok, kam daun bilong oil prais long wol maket bai no inap daunim winmani

bilong LNG bikos i gat wanpela prais tasol gavman i gat agrimen wantaim ol makel long Asia.

Gavman i tok maski prais bilong oil i kam daun o go antap, prais bilong LNG i stap wankain yet. Em i olsem sapos prais bilong oil i go antap, LNG bai salim long wankain prais, ol maket long Asia bai baim LNG oil long liklik mani.

Sapos prais i kam daun, ol maket long Asia bai lusim bikpela mani long baim liklik oil long LNG.

Gavman i tok PNG LNG i gat dispela agrimen na taim prais bilong oil long wol maket i pundaun, LNG prais bai no inap senis.

# NPCP kisim sea bilong Oil Search

NESENEL Petroleum Kampani bilong PNG (NPCP) i tokaut olsem em i pinisim ol sampela trenseksen long mani mak bilong USD 1.342 bilien ( K3.539 bilien) na baim moa long 9 pesen sea bilong Oil Search.



Menesing Dairekta bilong NPCP, Sea kampani i kisim em Wapu Sonk.

NPCP i pinisim olgeta trenseksen insait long 2014 na i kisim 149,390,244 sea bilong Oil Search long makim maus bilong gavman. 9.81 pesen.

NPCP bod, menesmen na ol dairekta i tokaut long dispela long dispela wik long Pot Mosbi.

Dispela sea NPCP baim em long baim K3 bilien UBS dinau gavman i kisim na tu bai putim mani long ol arapela wok bilong gavman.

Long pinisim ol trenseksen long baim sea bilong Oil Search, NPCP i bin wok wantaim ol arapela fainens kampani olsem ANZ Benk, BSP Benk, na Westpac Benk long kamap wantaim US 520 milien long baim sea bilong Oil Search.

Menesing Dairekta bilong NPCP, Wapu Sonk i tok baim bilong sea long Oil Search bai apim nem bilong kampani long PNG LNG projek na long olgeta oil na ges fil we Oil Search Limited i wok long moa long 95 pesen bilong Oil na Ges long kantri.

Mista Sonk i tok baim bilong Oil Search sea em i kamap gut wantaim plen bilong NPCP long wok insait long oil na ges bisnis long kantri.

Mista Sonk i tok NPCP i pinisim ol trenseksen long baim sea wantaim gupela mani sapot i kam insait taim kantri i salim LNG ges long 2014.

Kantri i bin lukluk long salim LNG ges long wol maket long Novemba 2014 tasol wok i pinis hariap na namba wan ges i bin go aut long Me 2014. Dispela i putim NPCP long gupela mak long mani sapot long baim sea bilong Oil Search.

NPCP Jenerel Menesa bilong Fainens, Robert Acevski ol trenseksen i pinis bin wanpela bikpela salens taim planti samting i kamap long ol wok bilong kampani na planti rot bilong wok long kisim mani na ol arapela salens i bin stap. Tasol em i tok gupela toktok namel long ol fainensia i lukim gupela kaikai i kamap.

Em i tok NPCP i kamap nau olsem PNG oil kampani, na tu i kisim aset bilong Cue Energy PNG. Em i tok kampani i yusim ol save insait long kantri yet long kamapim gupela wok na nau i gat nem olsem oil kampani bilong PNG.



Project fees, New uniforms, Text books? Start the year on a good note with all your back to school needs financed through a

## BSP PERSONAL LOAN

- ✓ 100% unsecured loan
- ✓ Flexible repayment terms
- ✓ Loan up to K50,000
- ✓ Quick approval



320 1212 / 7030 1212 - 24/7  
 servicebsp@bsp.com.pg  
 www.bsp.com.pg



Official Sponsor of the 2015 Pacific Games



# Ol benk i laik wok bung long hausing skim

**O'NEILL gavman i putim K200 milien long Bank bilong South Pacific (BSP) long gohet long hausing skim long dispela yia. Sampela moa benk i laik bung wantaim gavman tu Fainens Minista James Marape i tok.**  
Minista Marape i tok em i no

save hamas pipel i bin aplai long 2014 taim ol i bin lonsim skim tasol gavman i putim K200 milien sid mani pinis long BSP.  
Em i tok i no gat moa mani ol i putim antap long K200 milien Praim Minista Peter O'Neill i bin tokaut long en las yia, long

wanem kain mak mani bai stap yet long 2015.  
Minista Marape i tok moa olsem ol i tingting long putim moa mani tasol ol i no wokim long dispela yia. Em i tok bai ol i putim mani neks yia 2016.

## Digicel traim nupela laibreri wantaim ol skul

DIGICEL i givim sans long ol sumatin na ol tisa long traim nupela laibreri we ol i ken painim planti infomesen.  
Ol i traim dispela projek wantaim ol skul long sapatim ol long lainim nupela samting na gutpela hap long lainim.  
Dispela program i larim ol sumatin na tisa long gat ekse

long nupela laibreri we i gat 4 milien buk, ol sotpela piksa bilong lukim, megesin na niuspepa atikel. Digicel i givim 500 tablet masin long sampela skul long Pot Mosbi, Wabag, Mendi, Kavieng, Wewak na Alotau long namba wan hap bilong projek.  
Dispela tablet i gat banis sim kad bilong em we i helpim tablet long yusim netwok na konekt

long oflain laibreri.  
Gavman rilesen dairekta bilong Digicel, Gary Seddon i tok tenkyu long sapat bilong gavman long edukesen.  
Seddon i tok program bilong ol i wok bung wantaim ol sumatin long apim stended bilong edukesen. Ol i bilip olsem em i bai givim sans long ol sumatin insait long rijon.

## Newcrest Lihir Gold i sainim MoU wantaim BSP

NEWCREST, Lihir Gold Limited (LGL) i sainim wanpela agrimen wantaim Bank South Pacific las mun long soim sevis bilong BSP bai kamap gut na isi long ol wokman bilong LGL.  
Aninit long dispela agrimen, ol wokman bilong BSP bai go givim benking sevis long ples bilong wok bilong ol LGL wantaim ol sevis bilong benk na long sait bilong kisim dinau mani long BSP.

Dispela sevis bai lukim ol 2,000 wokman na meri bilong LGL bai no inap hatwok. Ol benk lain bai go givim sevis long wok ples bilong ol.  
Kantri Menesa bilong LGL, Peter Aitsi i tok dispela wokples agrimen em long strongim ol wokman long mekim gutpela disisen long famili bilong ol.  
Dispela agrimen tu bai lukim ol wokman bilong BSP benk bai helpim ol wokman na meri bi-

long LGL long kisim dinau na baim haus aninit long "First Home Ownership Scheme" program. Em bilong husat i laik kisim dinau long baim haus long namba wan taim tasol.  
Mista Aitsi i tok LGL i laik helpim ol wokman na meri long kisim gutpela sevis bilong benk long wok ples yet.  
BSP i tok em i amamas long wok bung wantaim Newcrest Lihir Gold Limited.

## Nupela helt senis i kamap

**Esther Bralyn Wani  
UPNG Sumatin i raitim**

PROVINSAL Helt Atoriti Ekt (PHA) em i wanpela nupela lo gavman i bin kamapim long palamen long 2007. Dispela lo i kamap long lukim olsem mani bai ken go stret long wan wan haus sik.

As tingting bilong dispela lo em bai bungim sevis dileveri long PHA, long kamapim wanpela bod bilong gavanens, wanpela menesmen tim, wanpela grup long kontrolim fainens na ol wokman na meri, luksave long ol haus sik long bus ples na ol publiik haus sik, na respekim pawa bilong provins.

Ol tripela provins i kisim pinis PHA Ekt em Westen Hailans, Isten Hailans na Milen Be. Long dispela yia, 5-pela provins em Is Sepik, Sauten Hailans,

Nu Ailan, Oro, Westen na Madang provins (bai sain long dispela mun, Januəri) i tingting long kisim namba wan kwata.

Long wankain taim, i bai gat senis long haus sik na provinsal helt ek sekyutiv menesmen pawa na wok bilong ol.

Tasol, bai i no gat senis long kondisen bilong ol wokman na meri o salari pemen taim tupela stafing straksa i bung long kamapim nupela PHA straksa.

PHA Projek Menesmen Yunit bai kamap long Januəri dispela yia, long plenim na karim aut PHA implementesen.

Indipenden rivi long bilong PHA implementesen fremwok i pinis long 2013. Namba tu rivi i stat long Desemba las yia.

## WHP Presiden i askim PNGTA opisel long hevi bilong liv pe

OL i askim ol opisel bilong PNG Tisa Asosiesen (PNGTA) long tokaut long wanem as ol i no stretim hevi bilong liv pe bilong ol tisa.

Presiden Aita Sngankepe bilong PNGTA Westen Hailans brens i singaut long jenerel seketeri Ugwalubu Mowana na nesenel presiden Tommy Hecko long tokaut long wanem as tupela i no stretim dispela hevi hariap.

Sngankepe i bilip olsem i no gat polisi freimwok na polisi alainmen insait long asosiesen we Mowana na Hecko i lukautim.

Em i tok ol i yusim wanpela no gut plen em ol tret i kam long ol rijonal seketeri em long weit na stretim gen ol wok bilong ol tisa long taim bilong skul, 2015 na ol hevi bilong ol tisa

long kot sapos ol i wokim.

Em i tok moa long taim bilong em, PNGTA i no save sapatim ol na ol i no gat gutpela pasin long sapatim ol tisa long mani long baim kot bilong ol tu.

Em i askim tupela man i makim 50,000 tisa long kantri, long wanem as tupela i no save toktok long hevi bilong ol tisa long liv pe bilong ol long planti nesenel bod miting.

Presiden Sngankepe i tok Nesenel Edukesen Bod em i rait hap bilong stretim ol lo long kamapim strongpela polisi long nesenel level, sub-nesenel level, distrik na lokal seting long toktok long liv pe bilong ol tisa.

Ol i traim long kisim toktok bilong Mowana na Hecko tasol i no inap.

## Mosbi polis mekim wok painimaut long Lae



Femili bilong Moana Pisimi i wetim wok painimaut bipo ol i planim bodi.

Investigesen Polis tim bilong Pot Mosbi bai go long Lae long painimaut long hevi i kamap long nu yia we wanpela yangpela meri Moana Pisimi husat i kisim katres na i dai long taim ol polis i ranim wanpela kar.

Bipo long dai bilong dispela meri, sampela lain i lukim olsem ol polis na tu sampela sekyuriti gat i bihainim em long kar long 3:30 moning long niu yia taim.

Polis Komisina Geoffrey Vaki i tok sapos ol painim aut husat man i mekim bai go long han bilong polis na

ol bai kisim bikipela sas.

Em i tok dispela pasin bilong kilim dispela meri em i wankain olsem ol narapela bikipela hevi we lo i no save tok orait long man bai mekim.

Komisina i tok ol polisman bilong Mosbi tu bai helpim long painimaut dai bilong wanpela bisnisman bilong Singapo long dispela taim tu.

Em i tok, em i givim oda long polis long ol i ken yusim olgeta strong na pawa bilong ol long painimaut dispela ol man husat i kisim dispela hevi na putim ol long kot.



CRC Bethel Baibel Skul yia 2 pastor trening i greduet long mekim wok misin long PNG na ovasis.

Wantok file poto.

# UNICEF na Edukesen wok wantaim

**EDUKESAN Dipatmen i wok bung wantaim UNICEF na givim imejensi saplai mani mak olsem US\$ 1 milien long 13-pela skul insait long kantri.**

Dispela saplai i olsem ol ikwipmen long yusim taim wanpela skul i kisim bagarap o klostu taim long painim hevi bai helpim ol.

Imejensi saplai em i wanpela program bilong Edukesen Dipatmen ol i kolim Edukesen Imejensi (EE) we UNICEF i wok poroman wantaim.

As bilong dispela helpim em long mekim ol sumatin i stap seif taim hevi we netja i save kamapim i bungim ol taim ol i stap long skul na tu, lainim ol tisa i daunim dispela hevi.

Em i no samting bilong kaikai, tasol ol haus sel (ten) bilong slip, ol bokis pulap long ol ikwipmen long lainim ol sumatin taim ol i bungim hevi, na ol samting bilong ol liklik pikinini long yusim long skul.

Ol tu i givim ol ikwipmen long ol famili husat hevi i bungim ol wantaim ol plet, kap, spun na tu ol blnket long karamap long nait na slip.

Na tu, dispela bai mekim edukesen i go long narapela level long wokim awenes long wanem kain bagarap ol sumatin bai kisim.

Ol arapela 9-pela provins i no kisim em ol imejensi saplai em Milen Be, Sentrel, NDC, Enga, Jiwaka, Hela, Sauten Hailans, Galp na Westen provins bai kisim nau.

## 22 provins i kisim EQUITYV edukesen program

TEN-pela provins long PNG i bin kisim EQUITYV Edukesen program bihain long ol arapela 12 pela provins i kisim pinis wantaim helpim bilong nesene gavman.

Dispela helpim em i kam aninit long wanpela projek ol i kolim Provinsel Diseminesen pPen we Nesene Dipatmen bilong Edukesen wantaim Japan Intanesene Kopresen Ejensi (JICA) i wok wantaim long en.

I no longpela taim i go pinis, JICA wantaim NDE i bin holim bikpela kibung bilong ol we ol wan wan mausman bilong edukesen long 22 provins i bin tokaut long tingting bilong ol long dispela program

Long dispela kibung, Asisten Seketeri bilong Stendet na Gaidens Divisen, Annemarie Kona, i tok EQUITYV em wankain olsem wanpela nupela samitng bai kisim edukesen i go long ol ples ol man ino inap long go long ol.

Ekting Seketeri bilong Karikulum Developmen Moderkai Baine, i sapotim toktok bilong em na i tok midia na ol niuslain em wanpela sanel long karimaut dispela program ol i kolim Stendet Beis Eduken Awenes (SBEA),

Em i tokim ol ol Provinsal Edukesen Divisen long wok bung wantaim na sapotim wok bilong NDE long kamapim gutpela edukesen we ol sumatin bilong dispela kantri i ken kisim gutpela lainim long em.

Menesa bilong Nesene Edukesen Midia Senta, Hatsi Mirou i tok em i amamas long ol Provinsal Edukesen Edvaisa na tim bilong em long pinisim dispela Provinsel Diseminesen Plen.

Em i tok dispela plen bai givim helpim long ol pikinini bilong dispela kantri we ol sumating bilong ples longwe bai kisim gutpela skul.

## nias

# Ol DBTI sumatin i greduet

**Joylyne Karato  
PNG sumatin i raitim**

Planti nupela kampani i wok long kam na dispela kantri i nidim planti wok man na meri husat i save long mekim ol teknikal wok.

Don Bosko Teknolojikal Institiut (DBTI) i bin holim namba 13 greduesen bilong em we i winim ol bipo taim greduesenseremoni.

Long dispela greduesen, 54 sumatin i bin kisim digri we

tripela bilong ol bai go tisa long Solomon Ailan.

Nau 210 sumatin i greduet we planti bilong ol i kisim diploma long kompyuta na liklik namba i greduet long stre-tim ol kar.

Ges spika, Steven Winduo, EktingDairekta bilong Odit long Yuniveseti bilong Papua Niugini i tok em i amamas long DBTI long greduetim planti sumatin, winim narapela ol teknikal koles long PNG.

Na tu, em i skruim toktok i

go moa na salensim ol sumatin long ol i ken amamas long wanem, ol i makim wanpela skul we ol i lainim planti samting long helpim komyuniti bilong ol.

Mista Winduo i kisim piksa long buk Baibel we wanpela man i tromoi liklik sit we ol i pundaun long graun.

Long wankain taim, em i strongim ol sumatin long lainim long rong ol i mekim na putim bilip na no ken tromoi ol gutpela pasin ol i lainim long

dispela skul taim ol i lusim na go aut long wok.

Wanem liklik sosel skil ol i lainim long DBTI i ken stap wantaim ol na ol i ken yusim long kamapim gutpela sindaun long komyuniti olsem gutpela lidasip, bungim manmeri long wokim grup wok na lainim ol long gutpela sindaun.

Em i tok dispela ol liklik skil bai kamapim ol pasin bilong olsem manmeri tru we luksave bai stap long komyuniti bilong ol na i no diploma o digri ol i kisim.



**WILMO GES HAUS:** Ol dispela meri i laik redim kaikai bilong ol lain i sindaun long wanpela woksop long Monoitu, Siwai long Saut Bogenvil. Ges haus i stap long ples Hire klostu long Monoitu Katolik Peris, Siwai. Planti lain i raun i kam long Siwai long mekim sampela wok i save kam slip long Wilmo Ges Haus. *Poto: Veronica Hatutasi*

## Tupela dai i kamap long Nu Yia

TUPELA man ol i kilim i bungim birua long narapela hap long Nu Yia selebren aut sait long Wewak taun.

Polis Stesen Komanda bilong Wewak, Inspekta James Baugen, i tok namba wan man ol i kilim em long Saure viles las wik Fonde taim ol i selebretim Nu Yia na dring bia.

Polis i tok ol i bin katim man long naip no gut tru na em i

lusim planti blut na dai.

Ol i karim bodi bilong man i dai i go long Wewak Jenerel Haus sik long mog na bai weitim ol polis long mekim wok painim long dai bilong em.

Long namba tu dai, wanpela mangi long Passam i gat 15 krismas i dai taim wanpela man i dring bia na katim em long het bilong em.

Dispela mangi i lukim piksa wantaim ol famili bilong em na stap long haus taim dispela saspek i kam insait long banis bilong ol. Liklik mangi i go aut long sekim na saspek i kilim em dai.

Ol i putim ripot long polis long dispela nait yet na bai ol polis painim aut moa long en.

Ol polis long Wewak i holim 53 pela pipel we ol i dring bia

na kamapim hevi long Krismas go inap Nu Yia.

Inspekta Baugen i tok tenkyu long ol rot sefti opisa long karim aut awenes bipo na taim bilong selebren. Dispela i wokim na nogat dai i kamap long ol kar i ron long rot.

Em i tok selebren i orait tasol long wanwan hevi we i bin kamap.

## SHP i senisim pasin long Nu Yia

OL polis long Sauten Hailans Provins i tok tenkyu long ol pipel long gutpela pasin long wok bung na amamas long Nu Yia. Dispela i soim olsem ol i senisim pasin bilong ol.

Mendi Polis Stesen Komanda na Ekting Provinsel

Komanda Inspekta Peter Buka, i tok pastaim no gat praivet kar i save ran long boda bilong Westen Hailans na Hela long nait bilong Niu Yia.

Em i tok ol pipel i save tromoim ston long ol kar, kukim

taia na blokim rot wantaim traipela ol diwai.

Dispela i no kamap olsem las wik long wanem rot i klia long olgeta boda, na no gat birua pasin na ol pipel i ran fri. Em i nupela pasin i kamap long SHP, Inspekta Buka i tok. Inspekta Buka i tokim ol

pipel long go yet long kain pasin insait long dispela yia.

Ol i kisim 9-pela lain husat i dring bia na draiv na ol i lokim ol long Mendi polis sel.

Dispela gutpela senis i kamap wantaim helpim bilong ol polis i patrol long rot.



# Nupela Kumu saplai projek bilong Purari



**Yut, Meri na Famili**  
*Pastor Barbara Lunge*

## Holi Spirit bai karim yu i go long prea

"LONG wankain pasin, Spirit i save helpim yumi taim yumi no gat strong, bilong wanem yumi no save long wanem kain beten bai yumi mekim. Tasol Holi Spirit yet i save beten long yumi wantaim bikpela kra i insait long bel we yumi i no inap long autim. Man husat i save lukim insait tru long bel bilong yumi i save wanem samting i stap insait long tingting bilong Spirit, bilong wanem em i save beten long God i helpim ol bilip man na meri." Rom 8:26-27.

### Wokim gen ol banis i bruk pinis.

Ol banis na dua i bruk i mas kamap gen. Dispela em sampela bilong ol dua i stap insait long buk bilong Nehemaia: 3:1 Dua bilong ol sipsip, 3:3 dua bilong pis, 3:6 Olpela dua, 3:13 Veli dua, 3:14 Pekpek dua, 3:15 Dua bilong wara kalap, 3:16 Wara dua, 3:28 Hos dua na is dua.

### De namba tri pawa bilong sios

"Tasol yu no ken lusim tingting long dispela samting, wanpela de long God em i makim wan tausen yia na wan tausen yia long ai bilong God em i olsem wanpela de tasol" 2 Pita 3:8.

Tasol sapos dispela Spirit husat i kirapim Jisas long matmat i stap insait long yu, man husat i kirapim Krai Jisas long dai inap long givim yu laip long bodi insait long spirit we i stap insait long yu. Rom 8:11.

"Kam, na yumi go bek long Yahweh; bikos em i bin brukim yumi i go liklik tru, na em bai oraitim yumi; em i bin bagarapim yumi, na em bai pasim ol sua bilong yumi.

Em bai kirapim yumi bek bihain long tupela de. Long namba tri de em bai kirapim yumi bek, na yumi bai stap laip oltaim long ai bilong em. Yumi mas mekim luksave long Yahweh.

Yumi mas taitim bun save moa long Yahweh. Olsem tasol san i save kam antap long moning taim, Yahweh bai kamap. Em bai kam olsem ren i pun-daun, olsem ren long taim bilong san i save kam long givim wara long graun." Hosea 6:1-3.

"Dispela bai soim sain long yu. Long namba wan yia yu bai kaikai samting i gro bilong em yet, na long tu yia bai yu kaikai yet long nupela kaikai i kamap long en; na long namba tri yia bai yu planim ol wain na kamautim, na kaikai prut bilong ol." Asaia 37:30.

### Graun bai malolo.

Bai yu mekim namba 5 yia kamap holi, na tokaut olsem olgeta pipel bai kamap fri insait long kantri. Em bai kamap jubili yia long yu; na wan wan man bai gat ol samting bilong em yet, na wan wan bilong yupela bai go bek long famili bilong yu yet.

Namba 5 yia bai kamap jubili yia bilong yu. Insait long dispela yia bai yu i no ken planim samting o kamautim kaikai long en, na bai yu no inap kisim kaikai long nupela diwai wain.

Bilong wanem em i yia bilong jubili; em bai kamap holi long yu. Bai yu kaikai ol samting i kamaut long graun bilong en. "long dispela Yia bilong Jubili wan wan bilong yupela bai go bek long graun bilong yupela yet." Wok Pris 25:10-25.

"Graun bai kamapim prut bilong en, na yupela bai kaikai na pulap tru, na bai yupela i stap long gutpela taim, i no gat hevi. Sapos yu tok, 'Bai mipela kaikai wanem samting long namba 7 yia?'

Lukim, yumi bai i no ken planim samting, na bai yumi no ken bungim kaikai long taim yumi gat planti kaikai; bihain bai mi givim tok orait long ol blesing bilong mi antap long namba 6 yia bilong yupela, em bai kamapim prut inap long tripela yia.

Bai yu planim samting long namba 8 yia; inap namba 9 yia, na ol prut bilong em i kam insait, yu bai kaikai long olpela bakstua." Wok pris 25:19-22.

**Toksava: Ol mama i gat wari, tingting planti, bel hevi yu mas ringim mi na bai mi helpim yu. Raitim pas long dispela adres na fon namba. Barbara Lunge, ROGIM, P.O. Box 3063. Boroko. NCD. PNG, o ring long 70995378 o salim email long: lungeb37@gmail.com**

ARERE long bikpela Wara Purari insait long Galp provins, wanpela meri, Elisa Sorio i amamas long soim ol kaikai long gaden bilong em. Nau tasol em i salim pinis ol namba wan kukamba prut bilong en na kisim K240 long kem bilong InterOil.

InterOil i kamapim sampela wok insait long dispela hap bilong Galp Provins long dispela taim bihain ol i kirapim Herd Bes olsem ples bilong lojistik bilong givim servis i go long drilling na sasmik eksploresen wok klostu long Elk, Entelop, Raptor na Triceratops petroleum diskaveri. Herd Bes em i ples bilong planti ol woklain bilong InterOil long sapotim fil operesen; olgeta kaikai na ol narapela saplai long haus kai bilong kem i kam long Pot Mosbi.

Hannah Philip, husat i wok long InterOil Komyuniti Afeas tim i traिम long groim kain kain kumu long lukim wanem kumu bai kamap gut long dispela hap bilong tais na graun i pulap long wara. Bihain bai em i helpim ol meri long ples long groim ol dispela kumu long salim gen i go long InterOil.

Dispela liklik projek long mak bilong ples tasol, i gat planti gutpela samting i kamap long en. Bilong wanem em i givim strong long ol meri long ples long mekim samting i narakain liklik, em i senisim kain stail bilong kaikai we ol i no kaikai wankain kaikai bilong bipo tumbuna tasol, na em i bringim mani i kam insait.



Elisa Sorio, meri long ples wantaim Hannah Philip bilong InterOil Komyuniti Afeas tim, i soim ol kukamba bilong en.



Nau taim dispela namba wan kaikai arere long wara i kamap gut, em i soim gutpela samting olsem dispela projek i ken kamapim nupela samting olsem ol ples lain yet i ken givim kumu prut saplai long ol petroleum kampani long hap bilong ol na tu ol i ken salim long ol maket bilong ol yet long komyuniti bilong ol.

*Poto: InternOil Komyunikesen*

## 2015 PNG Wimen Forum i redi long kisim nominesen

PAPUA Niugini Women Forum bilong 2015 i kam klostu nau na ol lain i go pas, U.S Embesi long Pot Mosbi i redi nau long kisim ol nominesen bilong ol meri husat i laik stap insait long dispela forum.

Dispela forum bai lukluk long jenda jastis na ikononik opotuniti bilong ol meri, na ol i ting olsem planti meri bai kam long olgeta hap kona bilong kantri long stap long dispela forum. Forum bai kamap long Mas 9 i go long Mas 11 long Crown Plaza Hotel insait long Pot Mosbi siti. Ol lain i go pas long forum, U.S. Embesi long Pot Mosbi na Gavman bilong Papua Niugini, i

opim nau nomiesen bilong ol meri bai resis long kisim ples long go insait.

Dispela forum i no gat pe bilong em tasol ol bai makim ol meri long stap insait long forma, bihainim nomiesen tasol. Sapos yu laik makim yu yet o narapela meri, yu mas pulim mapim wanpela pepa bai yu ken kisim long websait bilong US Embesi long adress olsem:

<http://portmoresby.usembassy.gov/women.html>.

Yu ken kisim tu long pepa long U.S. Embesi opis long Pot Mosbi long daun taun na tu long Ameriken Kona bilong

Nesanel Laibreri. Taim bilong nominesen bai pinis long Januəri 23.

Namba wan sans bai go long ol meri husat i mekim sampela lidasip wok long komyuniti na sivel sosaiti grup, ol meri husat i save tok tok long rait bilong ol narapela na long strongim wok bilong ol meri, ol meri i ronim bisnis, ol yangpela lida meri, ol yangpela meri pablik sevan, na ol man husat i gat strongpela laik long strongim ol meri na jenda ikwaliti.

Husat meri ol i makim bai kisim sponsa U.S Embesi, Australia Hai Komisen long Papua Niugini na ExxonMobil

PNG long wokabaut bilong ol i go long Pot Mosbi na long baim ples bilong slip na kaikai. Ol meri husat i gat laik long nominetim nem i ken lukim asenda long dispela websait adres <http://portmoresby.usembassy.gov/women.html>.

Nem bilong ol lain bilong jas na spika bai kamaut long stat bilong yia 2015, olsem na putim yau long dispela. Embesi na PNG Gavman i tok tenkyu long Australia Hai Komisen, ExxonMobil PNG, na Crowne Plaza long givim gutpela sapot long dispela forum.



# Kaugere helt senta bai helpim Pot Mosbi Jenerel Haus sik

POT Mosbi Jenerel Haus o Pomjen sik i save pulap olgeta taim long ol pipel i gat ol liklik sik we i save kamap olgeta de, na ol pipel wantaim ol bikpela sik stret. Tasol nau Kaugere helt senta bai helpim long sevim ol sik pipel wantaim bikpela sik tu.

Dispela bai givim wok long mak bilong ol wok man meri long Pomjen na bai no gat planti presa olsem pastaim.

Sif Eksekutiv Opisa bilong Pot Mosbi Jenerel Haus sik, Grant Muddle i tok Kaugere i save helpim ol na sevim ol lain wantaim liklik sik. Ol imejensi na hatpela sik ol i save salim i go long ol.

Dokta Patrick Koliwan bilong Kaugere i tok taim ol i bin stretim helt senta long Ogas las yia, i gat gutpela ol samting long sevim ol sik pipel.

Dispela long tubakolisis (TB) klinik, klinik bilong bel mama, famili plening, volantia kaunsel na tes bilong HIV na gutpela autpesen na imejensi wod na hap bilong ol lain i sik no gut tru long slip wanpela de tasol.

Living Lait Fo Skwe Sios i bung wantaim Nesenel Kapitel Distrik helt sevis, wantaim wanpela dokta na 20 pela wok man meri we ol i save sevim olsem 300 sik pipel long wanpela de.

# PNGDF kisim medikol saplai ikwipmen long U.S

**PNG DIFENS Fos haus sik insait long Taurama Bareks, Pot Mosbi, i bin kisim bikpela helpim i kam long Gavman bilong Yunaitet Stets bilong Amerika wantaim Projek C.U.R.E. (Commission on Urgent Relief and Equipment).**

Em i wanpela NGO bilong Amerika, na ol i salim ol medikol saplai na sampela ikwipmen bilong wok i kam long PNG Difens Fos long las mun.

U.S. Embeseda long Papua Niugini, Walter North, i makim dispela U.S NGO na gavman bilong U.S.A na i givim ol dispela samting i go long PNG Difens Fos Militri Haus sik long Desemba 11.

PNGDF Komanda, Brigadia Jeneral Gilbert Toropo, i bin makim Taurama PNGDF haus sik long kisim ol dispela marasin na ikwipmen.

Mani mak bilong ol dispela medikol saplai na ikwipmen i sanap olsem US\$200,000 (K500,000).

Em i kam wantaim ol ikwipmen bilong stretim tit, marasin bilong ol pikinini na sampela fenisa o bet, tebol na sia bilong haus sik.

“Ol dispela ikwipmen i kam long rait taim long haus sik bilong mipela bikos mipela i bin wokim apgret tupela yia i go pinis na em i lusim mak bilong en olsem wanpela helt klinik

i go long mak bilong haus sik inap long lukautim 150 sikman long wan wan de,” Komanda Opisa bilong PNGDF Militri Hausik, Leptener Kenel Mathew Kasap i tok.

Projek C.U.R.E. i tredmak bilong Benevolent Heltkea Foundesen, wanpela rilif ogenaísesen, i stap long Amerika.

Em i wanpela bikpela ogenaísesen i save bringim medikol saplai na ikwipmen long ol nupela kantri olsem Papua Niugini.

Ol i save kisim ol donesen na bihainim givimaut long ol kantri husat i no gat samting olsem o i painim bikpela hevi.

# Planti dai kamap long taim bilong karim bebi

**Esther Bralyn Wani UPNG sumatin i raitim...**

LONG impruvim o kamapim gut helt bilong ol pikinini na mama em i wanpela bikpela salens long wanem mak long 87 pesen bilong populesen long kantri i stap long bus ples. Na planti ol hap i no gat

gutpela haus sik na helt senta, menesa bilong Famili Helt Sevis, Dokta William Lagani i tok.

Dokta Lagani i tok long lonsing bilong buk ‘Maternal Mortality in Papua New Guinea’ olsem, PNG i no inap yet long bungim Milenum Dvelopmen Gol (MDG) long 2015 long wanem namba bi-



Dokta William Lagani i lonsim buk ‘Maternal Mortality in Papua New Guinea’.

long ol mama i dai taim ol i karim bebi i bikpela tru.

Em i tok moa olsem 733 dai i kamap insait long 100 000 bebi ol mama i karim long PNG. Mak long 40 pesen mama save karim bebi em ol wok man meri bilong helt i save helpim ol.

Dokta Lagani i tok long ripot bilong buk olsem long daunim dispela hevi, em i no long save long namba bilong ol mama i dai long pablik na praivet haus sik, long ples, long haus o long rot, tasol em i gutpela long save long medikel na sosel birua i kamapim dai.

Insait long dispela buk, Dokta Lagani i lonsim i gat ol stori bilong ol mama insait long kantri we ol i bungim hevi taim ol laik karim bebi na ol ripot bilong kantri long sait bilong ol mama na bebi wok long dai.

# Ilektoral i tok gutbai long tupela longpela taim woklain

ILEKTORAL Komisina, Andrew Trawen i tok tenkyu long tupela sinia na longpela taim wok-meri we putim wantaim, i bin wok olsem 72 kris-mas wantaim PNG Ilektoral Komisen (PNGEC).

Tupela meri i pinis long wok i save wok long het kwata long Pot Mosbi. Bisia Robert husat em Asisten Enrolmen Menesa wantaim Enrolmen Seksen, na Karo Kila husat i Akaun-ten bilong PNGEC wantaim Fainens Brens.

Bisia husat i save tok-tok isi em bilong Papa

viles long Sentrel Provins i wok long PNGEC olsem 34 kris-mas. Karo husat i hatpela, tasol meri bilong stap isi, em i bilong Karo viles long Sentrel Provins tu em bin wok olsem 38 krismas.

Bisia i bin statim wok wantaim Komisen long 1974 na em bin lusim long 1999 tasol em i go bek wok gen long 2005 inap long 2014. Karo i bin stat wok long 1976 olsem Kuskus Asisten tasol em i wok go nau em i lusim wok olsem wanpela Akaunten.

Mista Trawen i tok tu-

pela em ol meri bilong wok hat na tupela i no save giaman, na em i sore long lusim tupela.

“Karo Kila i bin wok wantaim EC olsem 38 krismas wantaim tok tru na em i save givim taim bilong em, na Bisia i bin kisim promosen olsem Enrolmen Menesa bikos long bikpela ekspiens bilong em wantaim Enrolmen Seksen.

“Sapos yu save long wanpela lain longpela taim, em i hat long lukim ol i go tasol helt bilong ol em bikpela samting,” Mista Trawen i tok.

# Ol sumatin i wokim haus karim long bus bilong PNG

PLANTI hevi i save painim ol mama long Papua Niugini taim ol i laik karim bebi na planti i save dai long dispela taim.

Nau ol sumatin bilong skul bilong wokim ol haus (Architecture) long Yunivesiti bilong Melbourne i kamapim wanpela plen bilong liklik haus karim wanpela nupela kain toilet sistem, long helpim ol mama na bebi bilong ol insait long Suanum komyuniti, wanpela ples i longwe tru long taun tasol i stap arere long solwara long hap bilong Turubu, Is Sepik Provins.

Australia Hai Komisen na Yunivesiti bilong Melbourne Bower Studio i bin bungim mani mak bilong AUD\$60,000 long wokim dispela projek em bilong kamapim gutpela senitesen na daunim namba bilong ol meri na bebi i save dai long taim bilong karim. Em i gat gutpela wara i ron, gutpela, klinpela hap bilong karim bebi we 4-pela mama i ken slip long gutpela bet wantaim gutpela toilet insait.

Dokta David O'Brien bilong Fekalti bilong Akitekksa, Biding na Plening, i bin go pas long dispela Bower Studio projek tim, na i toktok wantaim ol komyuniti long Suanum long wokim plen na wokim dispela seniteri haus.

“Dispela em i wanpela kain sans stret bilong ol Masta ov Akitekksa sumatin long kisim moa save long wokim ol disain bilong haus na long lain pasin bilong toktok wantaim ol komyuniti. Tim bilong mipela i kamapim gutpela haus i bihainim sindaun na kastom bilong ol Suanum, we i gat 100 pipel i no gat wanpela helt pos o klinik i stap klostu.

“Klinpela na Seif ples bilong karim i save helpim ol mama long no ken kisim bagarap na tu ol bai karim gut bebi na bebi i stap seif long namba wan mun bilong em. Ol dispela haus karim bai kamapim gutpela helt,” Dokta O'Brien i tok.

Dokta O'Brien i tok moa olsem liklik namba tasol bilong ol meri long PNG i save karim bebi long ol helt senta o haus sik, olsem na planti dai i save kamap na mak bilong PNG i winim ol narapela kantri long wol we wanpela bilong 10-pela mama i karim bebi i save dai. Mak bilong ol bebi i dai i winim namba i save dai long Australia inap 10-pela taim moa. Long PNG sapos 1000 bebi i kamap long wanpela taim, 47 bilong ol i save dai na long Australia em 3-pela tasol bai dai sapos i gat 1000 bebi i kamap.

**Maternal Mortality in Papua New Guinea**  
The stories BEYOND the numbers

Nupela buk i soim planti dai i kam long taim bilong karim pikinini.

National Department of Health Papua New Guinea

World Health Organization Country office Papua New Guinea

# Polye singaut gen long gavman daunim 2015 mani plen

Stanley Nondol i raitim

**OPOSISEN** lida Don Polye i singaut gen long O'Neill gavman i mas daunim K16.2 bilien mani plen bilong kantri bikos prais bilong oil long wol maket i pundaun, LNG bai no inap mekim inap mani na kantri i no gat inap mani long putim long mani plen.

Mista Polye i mekim dispela singaut gen long las wiken bihain long em i mekim wankain

toktok long ol wik i go pinis.

Tasol gavman i strongim 2015 baset na i tokim kantri olsem gavman i luksave long wanem samting i kamap long prais bilong mineral na oil long wol maket na i gat inap mani long risev i stap long mani mak bilong K6bilien long ranim kantri.

Praim Minista Peter O'Neill, Minista bilong Fainens, James Marape, na Minista bilong Tre-sari, Patrick Pruaitch i tok ol tok-tok bilong Don Polye i no ken

pretim ol bisnis na ol investa bikos gavman i gat inap mani na bai go het wantaim mani plen long K16.2 bilien.

Dairekta bilong Institut bilong Nesenel Afeas Paul Barker i tok gavman i mekim mani plen long bikpela tingting long LNG bai pulim bikpela winmani i kam insait long kantri. Tasol prais bilong oil long wol maket i pundaun so gavman i mas daunim mani plen bilong en.

Minista bilong Fainens James

Marape long wanpela pas i go long midia i tok, taim gavman i mekim baset em i mekim long tingting olsem prais bilong ol komoditi bai kam daun na i go antap. Baset i stap namel long ol prais go antap na kam daun.

Em i tok pundaun bilong oil prais long wol maket na prais bilong LNG bai no inap bagarapim K16.2 bilien mani plen bilong kantri.

Mista Marape i tok gavman bai go het wantaim mani plen

bilong kantri. Em i tok ol skul long kantri bai kisim fri edukesen mani long dispela mun.

Mista Marape i tok gavman i gat inap mani na pret toktok bilong Mista Polye olsem kantri i no gat mani, i no tru.

Em i tok i gat K6 bilien i stap long risev na i givim moa strong long mani pawa bilong kantri.

Oi independen lain olsem INA, BPNG na ol saveman i tok gavman bai i no inap mekim inap mani taim prais bilong oil long wol maket i pundaun.

Mista Barker i tok PNG LNG i resis wantaim ol bikpela kantri olsem Saudi Arabia long salim oil na ol dispela bikpela kantri i

bin stap long oil maket long planti yia na i save long sanap strong long taim nogut na gutpela taim.

Oi bikpela kantri i laikim oil prais i bai stap strong na ol i no wari tasol PNG em nupela long oil maket na taim prais i pundaun, winmani bilong LNG tu bai pundaun.

Em i tok moa olsem gavman i no ken dinau moa mani na i mas putim mani stret long ol projek olsem rot, bris, skul na haus sik wantaim lo na oda long ol pipel bai kisim sevis.

Em i tok gavman i mas daunim mani plen taim LNG na ol mineral prais i pundaun bikos winmani bilong kantri bai kam daun.

## O'Neill opim Raba Raba bris

Ol tausen manmeri na pikinini stap long ol eria long Raba Raba stesi0n long Milen Be provins bai kisim sevis long nupela bris bihain long Praim Minista Peter O'Neill i bin opim long las wik.

Mista O'Neill tu i mekim tok promis long givim tu klinpela wara saplai long ol pipel long hap na dispela em bai namba wan taim long ol pipel i lukim kain sevis olsem.

Taim Praim Minista O'Neill i opim dispela nupela bris, em i tokim ol pipel bilong Milen Be olsem dispela bris wantaim nupela rot we konstraksen wok i kamap yet, bai givim gutpela sevis long ol pipel long Raba Raba.

"Long namba wan taim ol egrikalsa fama long ol eria long Raba Raba bai kisim ol samting bilong ol i go salim long gutpela maket.

"Yumi i mas wokim ol infrastraksa olsem rot, bris na ol arapela we bai helpim ol pipel bilong yumi long kantri," Mista O'Neill i tok.

Mista O'Neill i tok gavman em i go pas en i bilong ol manmeri na pikinini long ol rurel ples olsem Raba Raba bikos planti ol pipel bilong kantri i stap long ol rurel ples.

"Yumi nidim ol infrastraksa long ol rurel ples. Yumi nidim helt kea, edukesen long ol pipel bai kisim sevis. Long givim ol dispela



Praim Minista Peter O'Neill.

sevis yumi mas wokim ol infrastraksa olsem rot na bris na em bai mekim isi long bisnis bai gro na gavman sevis tu bai ran isi." Mista O'Neill i tok.

Dispela nupela bris long Raba Raba (stap long piksa) em wanpela bilong ol 6-pela liklik sip bris we Minista bilong Nesenel Plening, na memba bilong Alotau, Charles Abel i wokim long DSIP mani.

Oi liklik bris em ol kontrakta i wokim long simen long ol i ken sanap strong long taim bilong bikpela win na i ken stap longpela taim na bai i no inap bagarap hariap.

Long wankain taim, Praim Minista O'Neill i tokaut long K1 milien bilong wokim gutpela wara saplai bilong ol pipel long hap.

Mista O'Neill i tok gavman i wok strong na lukluk long givim gutpela sevis olsem gutpela wara, rot, bris na skul long ol pipel stap long rurel ples bikos planti yia go pinis, gavman long Waigani i no bin lukluk long givim ol kain sevis long ol pipel stap long rurel ples.

**SMART ENERGY**  
COMING SOON!

**origin**  
gas does it!

**A LIMITED STOCK OFFER COMING SOON**

**LIFE MADE EASIER**

- Renewable energy for lighting
- Cleaner energy for cooking
- Convenient energy for phone charging

**Welcome to SMART ENERGY!**  
A convenient and affordable way to Live Smart, Cook Smart and Talk Smart.

Original Energy from the sun... Life made easier

LPGas... Life made easier

WATCH THIS SPACE FOR ONGOING PROMOTION FOR THIS PRODUCT.



# Lukluk Bek long Yia 2014 long ol samting i kamap long Sios

## Wantaim Veronica Hatutasi

OL SIOS long Papua Niugini i mekim bikpela wok long bringim ol sevis long sait bilong spirituel, sosel, fisikel, helt na edukesen i go long ol pipel bilong dispela kantri.

Bikpela hap bilong helt na edukesen sevis insait long PNG i kam aninit long ol sios.

Katolik Sios i go pas long sait bilong givim ol helt na edukesen sevis, wantaim Luteran, Angliken, Yunaitet, Salvesen Ami, Baptis na ol narapela pentekostel na ol liklik sios tu.

Bikos ol sios i stap wantaim ol pipel long ol ruel eria na ol longwe ples long bikbus, maunten na ol ailan, gavman i lukim na kisim ol (sios) olsem ol bikpela na strongpela patna bilong em long kamapim ol wok developmen na sevis i go aut.

Wok patna namel long ol sios na gavman i stap pinis na i go het long ol eria olsem helt, edukesen na sosel sevis. Australia i luksave tu long gutpela wok ol sios i mekim na AusAID i save givim bikpela sapot long sait bilong mani na ol narapela sapot. Em i luksave long gutpela ripot ol sios i gat long rot ol i yusim mani long em (transparency), yusim mani stret long ol helt, edukesen na sosel sevis, i no paulim na stilim mani na ol wok i kamap.

Olsem na inap i kam nau, ol sios i strongim ol wok long givim ol sevis. Maski ol i bungim hevi sampela taim olsem mani i sot, ol i no slek, tasol ol i strong long sevim pipel wantaim laik pasin bilong sevim pipel.

## Sampela ol bikpela samting i bin kamap long ol sios long las yia, 2014: KATOLIK SIOS:

Long dispela yia, Katolik Sios long PNG na wol i bin lukluk, skruim na strongim wok long 4-pela samting i stap long 2014 kalenda bilong sios yet.

Em long FAMILI, EVANJELISESEN, ENVAIROMEN NA SOSEL JASTIS.

## FAMILI NA EVANJELISESEN:

Sios i lukim olsem famili em i faundesen o namba wan ples we i lainim na strongim ol memba bilong em long kamapim na bihainim ol gutpela pasin, luksave long ol narapela na mekim gut long ol, lukautim envairomen, na strongim ol gutpela pasin long kamap ol gutpela memba na lida insait long famili, komyuniti na kantri.

Sios i bilip olsem sapos famili i ken strongim ol dispela velyu insait long famili yunit yet na sindaun gut, bai i no gat planti sosel hevi na tu, long loa na oda.

Olsem na stat long 2014



**OPIM:** Prosesio long pinisim lotu long opim nupela Sen Charles Lwanga haus lotu long mun Jun las yia. **Fail Foto**

yia yet, ol program bilong ol Katolik daiosis na i go daun long peris level i bin strongim evanjelisesen insait long famili pastaim we ol famili i mas pre strong long ol wan wan haus. Ol yut insait long ol daiosis na peris i bin bihainim wankain program na tu, ol i bin skruim long sait bilong envairomen.

Insait long lotu bilong selebretim pestode bilong Holi Famili long Januəri 5, 2014 long Sen Charles Lwanga Peris, Nesenel Kapitel Distrik, olpela peris pris, Pater Mark Kautu i bin mekim strongpela toktok toktok i go long ol papamama long givim gutpela stia i go long famili na moa yet, long ol pikinini bilong ol.

Em i bin tok famili em i faundesen o as bilong olgeta samting, tasol tude, em i bungim planti salens.

Long Katolik Sios kalenda olgeta yia, namba wan Sande bihain long Krismas em i Holi Famili pestode.

"I gutpela long dispela pestode tude i mekim yumi lukluk bek na glasim laip long ol famili bilong yumi, na ol wok yumi gat long en.

"Yumi mas karimaut gut ol wok bilong yumi insait long famili. Famili em i as long olgeta samting. Taim famili i stap gut, laip na sindaun bai ron gut tasol.

"Ol papamama i mas givim gutpela stia na go pas long ol pikinini long soim rispek, bihainim gutpela pasin, marit laip na moa. Sapos yumi larim ol pikinini i lukluk ausait long ol stiatok, dispela i no gutpela.

Long namba wan rit bilong dispela Sande, Buk bilong Zirach i toktok long kain stap bilong ol pikinini, papamama olsem ol marit insait long famili.

"Ol besik samting olsem pasin bilong mekim gut long ol narapela, rispek na stap pas long wangepa poroman insait long marit i mas stap long strongim famili yunit.

"Holi famili (bilong Maria, Joseph na Jisas) i bin skruim gut wok em bikos God i stap insait long famili.

"Sampela disisen ol papamama i wokim i kamapim hevi long famili. Olsem na long taim bilong mekim disisen, tingim olgeta famili lain

na wanem gutpela na hevi em bai mekim, na kisim tingting bilong ol tu," Pater Mark i tok.

"Ol bikpela samting i stat long famili we papamama i mas skulim na givim stia i go long ol pikinini em; laik pasin na rispek, rot long stap olsem wanem wantaim ol narapela lain, toktok long tumora na ol pikinini i ken redi na lainim long lukautim laip na sindaun bilong ol bikos papamama i no inap stap laip i go i go," Pater Mark i tok.

Em i tok tu olsem long kain stap bilong tude, planti papa i wok long lusim mama wantaim ol pikinini na hevi i kamap.

Long planti Sande lotu long las yia, askim i bin go long ol famili long strongim preia laip bilong ol sapos ol i makim wangepa o tupela de insait long wangepa wik long wokim famil prea o famili i sindaun, stap na pre wantaim.

Long mun Novemba las yia, Bisop Arnold Orowae bilong Wabag Daiosis i presiden bilong Konpres bilong ol Katolik Bisop bilong PNG na Solomon Ailan i bin makim Katolik Sios bilong PNG na Solomon Ailan insait long famili sinod o bung i bin kamap long Rom, Itali.

"Famili i namba wan ples we ol manmeri i save long Bikman na tu, lainim long save long sios, Bisop Arnold Orowae i tok taim em i givim PNG Katolik Sios ripot bilong em long bikpela famili bung bilong ol Katolik Sios lida long Rom.

Bisop Arnold bilong Wabag Daiosis i presiden bilong Konpres bilong ol Katolik Bisop bilong PNG na

Bisop Arnold i tok tude, planti famili i wok long bungim ol hevi na salens we ol i mas abrusim long bildim ol helti famili.

Em i tok famili em ples we ol i toktok, glasim na skelim ol samting na sios i amamas long ol planti Katolik famili husat i bilip long ol Gospel velyu, bihainim famili laip, skulim ol pikinini bilong ol na givim gutpela piksa we ol narapela famili i ken lukim na bihainim.

Em i tok Pop Francis i bin kirapim strong tingting bilong ol famili long go bek long

Baibel, ritim Gutnius wantaim ol pikinini long ol haus bilong ol na insait long ol Besik Kristen Komyuniti (BCC), pre long en na makim olsem hap long famili laip bilong ol olgeta de.

Long tude tu, sios i lukim olsem famili em i namba wan ples we wok ivanjelisesen i stat.

## SOSEL JASTIS NA ENVAIROMEN:

Long wangepa bikpela bung bilong ol bikpela na strongpela kantri long wol ol i kolim ol long G20 kantri i bin kamap long mun Novemba long Brisben, Australia, hetman bilong Katolik Sios long wol, Pop Francis i bin salim wangepa pas na askim ol long tingim na mekim samting long helpim ol tarangu na ol planti ol yangpela pipel long wol i no gat wok.

Ol G20 kantri em Argentina, Australia, Brazil, Canada, Saina, Yuropien Yunien (EU), France, Gemani, India, Indonesia, Italy, Japan, Mexico, Rasia, Saudi Arabia, Saut Afrika, Sauth Korea, Turkey, Yunaitet Kingdom na Yunaitet Stets.

Long pas bilong em, Pop Francis i bin askim strong ol G20 lida long tingim wok ol i gat long kamapim fea na trensperen (o no ken Haitim tasol soim long ples klia) iekonomik straksa we bai stopim wok "recession" o i bungim hevi long mani, tred na bisnis i go daun.

Pop Francis i tok strong olsem i gat nid long banisim pipel long mekim no gut long sait bilong fainensel sistem na moa yet, long samting i bin kamap long 2008 na wol i bin bungim hevi na go daun long mani, tred na bisnis.

Em i tok dispela i narapela bikpela asua long bagarapim ol rait bilong man.

"Tingting long kisim bikpela profit o winmani em i as bilong olgeta wok iekonomi o mani we i rausim ol wan wan man na bai no gat wabel pasin na jastis.

"Wok long tingim ol tarangu na ol lain no gat man i tingim i mas wangepa bikpela samting insait long ol politikel disisen, maski long nesenel o intanesenel level," Pop Francis i tok.

Long pas bilong em long

Praim Minista bilong Australia, Tony Abbott, Pop i bin autim wari long solwara i wok long kam antap na na kamapim bagarap, planti pipel i no gat wok i wok long go bikpela na moa yet, namel long ol yangpela pipel.

Em i tok planti man i no gat wok inap kamapim ol kriminel pasin na tu, pasin bilong kisim ol man long kamap ol teroris.

Olsem nae m i singaut long ol G20 kantri long wok bung wantaim na go pas, aninit long Yunaitet Nesens sistem, long stopim wok teroris.

Long pas bilong em, Pope Francis i tok i gat nid long ol G20 lida long edresim klaimet senis.

"Bagarap i go het yet long naturel envairomen, no gat kontrol long yusim ol samting long envairomen na dispela bai gat kikkbek long iekonomi bilong wol," Pop Francis i tok.

## SVD BOS KAM LONG PNG:

Mun Julai long las yia i bin lukim Supiria Jenerel o Bos bilong ol SVD long wol, Pater Heinz Kuluke,

i kam long PNG.

Pater Heinz bilong ples Spelle long kantri Jemeni i mekim opisel wokabaut i kam long PNG long Julai 22 inap long de namba 28 olsem hap wok bilong em long raun lukim ol kongriksen bilong em i stap wok long samting olsem 80 kantri long wol.

Em i bin raun lukim ol kongriksen na ol SVD institusen long Hagen, Kundiawa, Goroka, Madang na Mosbi.

SVD kongriksen i gat 6,000 misinari long wol. Long ol dispela, 3,000 em ol Holi Spirt Sister (SSpS) i stap wok long 40 kantri na 340 Adoresen Sister i wok long 22 kantri.

Long PNG yet, i gat 100 SVD misinari i wok i stap na 30 pesen em ol asples PNG lain i wok olsem ol pater, Bruder na ol SSpS Sister.

Pastaim i bin gat samting olsem 300 SVD misinari long PNG, tasol bikos SVD i wangepa intanesenel kongriksen, ol i salim planti i go aut long ol misin ovasis olsem long Saut Amerika, Afrika na ol narapela kantri moa.

Namba wan SVD misinari Pater Arnold Jansen SVD na ol lain bilong em i bin krugutum graun bilong PNG long yia 1907 taim ol i kam sua long Sepik.

"Bikpela salens mi lukim em long skulim ol tarangu long rit na rait bikos edukesen bai kisim man i go fowed long laip.

"Narapela em long no ken akseptim salens olsem samting i kam nating, tasol olsem samting bai strongim wan wan man long laip na sindaun bilong em," Pater Heinz i tok.

Pater Heinz i tok em i laik lukim ol komyuniti i sapotim ol misinari wok.

## LUTERAN SIOS:

Mun Januəri 2014 i bin lukim Evangelikal Luteran Sios (ELC-PNG) long PNG i holim bikpela sinod o sios bung long Karkar Ailan, Madang Provins.

Moa long 5,000 sios lida, ol bikman na ol sios memba long PNG na ovasis i bin bung na toktok long ol samting we sios i lukim olsem i gat hevi long ran bilong em, luksave na strongim wok bung wantaim namel long sios na gavman long ol kain sevis na developmen insait long kantri na ol sios program bilong em.

Long dispela yia tu, Luteran Siping we sios i gat ol sip i mekim ol ran insait long sampela hap bilong kantri na moa yet, long Momase rijon, i bin bungim hevi long wok mani na stopim ol wok bilong em. Planti sios memba na ol pablik we dispela siping sevis i save helpim ol i no bin amamas. Luteran Sios i mas painim sampela gutpela rot long stretim hevi na kamapim bek dispela sevis.

Wangepa gutpela samting we Luteran Sios i ken amamas long en nau em long gavman i tok oraitim Luteran Yunivesiti bai kamap long kantri.

Dispela i kamap bihain long Nesenel Palamen i pasim lo pinis long kakmapim Luteran Yunivesiti insait long kantri we Minista bilong Haia Edukesen Malakai Tabar i go pas long en.

Dispela lo bilong kamapim Luteran Yunivesiti i bin go insait long tripela riding olgeta long mekim em i kamap olsem lo bilong Palamen bai olgeta pepa bilong em i ken go long nesenel gaset na stap insait long lukaut bilong gavman long olgeta yia long sait bilong baset.

Dispela em olpela bil bilong Palamen we i bin kamap bipo long 2012 na i stap inap klostu long pinis bilong 2014 taim Minista bilong Haia Edukesen i kisim sapot long kamapim we em gat baset na sapot bilong nesenel gavman nau.

74 memba long floa bilong Palamen i bin sapotim bil bilong Luteran Yunivesiti na no gat bin kamap, memba i bin egensim.

Ripot bin kamap bipo olsem Martin Luther Seminari long Lae bai kamap olsem Luteran Yunivesiti na ol bin mekim planti pepa wok na ol wok redi pinis long en aninit long olpela gavman bilong Somare.

Praim Minista Peter O'Neill i soim amamas bilong em long Minista Tabar long kamapim dispela bil bilong Luteran Yunivesiti olsem nau gavman bilong em i mekim dispela i karim kaikai nau.





KOMENTRI

# Nupela yia na planti gutpela senis bai kamap long kantri

**Hepi 2015 Papua Niugini! Nupela yia i kirap nau na yumi olgeta i pasim tingting long lukim olsem i gat gutpela senis tu i kamap long laip bilong yumi wan wan na long kantri bilong yumi tu.**

Ol hevi bilong lo na oda i stap yet na i wok long givim nem nogut long kantri. Pasin bilong sampela raskel polis tu i mekim ol pipel i no bilip tumas long wok bilong ol polis long lukautim lo na oda. Na planti tisa i gat belhevi bikos gavman i no stretim liv pe bilong ol. Planti bilong ol i wet yet na klostu bai skul i stat gen. I gat toktok i kamap long bringim dispela wari na sampela moa hevi i go long kot. Ating sapos ol tisa i mekim olsem bai 2015 skul yia i no inap stat gut na ol pikinini bai kisim taim.

I gat planti gutpela samting bai kamap long Papua Niugini long 2015. Long mun Jun bai bikpela Pasifik Gems i kamap long Mosbi na ol wok i kamap yet long pinisim ol spot graun na haus slip bilong dispela bikpela gem.

Ol wok i gohet yet na gavman i tok olgeta samting bai redi long taim bilong dispela bikpela gem.

Ol spotmanmeri bilong yumi i redi nau long soim strong na save bilong ol egensim ol arapela spotmanmeri bilong Pasifik na yumi amamas bikos PNG i gat ol top spotmanmeri tu ya.

Long wok politik tu i gat planti salens ol lida bilong yumi bai bungim long dispela yia. Palamen i givim tokorait long bikpela mak tru bilong baset mani bilong kantri long dispela yia.

Orait ol memba i mas was gut na lukim olsem dispela mani i go stret long kamapim ol wok ol i

2015 em taim bilong stretim ol haus bilong pablik sevan...



**Mi bikpela wokman bilong gavman, tasol mi silip long setelmen..wantaim ol wantok..Rentim haus long siti i hai tumas na mi sevim moni na stap long setelmen.**

makim long en. Ol i givim bikpela mani na pawa i go long wan wan distrik insait long kantri. Dispela i wanpela bikpela senis tru na yumi hop i gat inap saveman na meri i stap long ol distrik long bosim gut mani, ol wok na ol wokmanmeri long bringim sevis i go long ol pipel. As bilong givim moa mani na pawa long ol distrik em long kamapim developmen long ol ples.

Wanpela bikpela salens bilong dispela yia em long helpim ol wokman na meri long kamap papa bilong gutpela haus we ol i ken sindaun gut wantaim famili. Planti komplek i wok long kamap long haus i sot na ol wokman bilong gavman na kampani i slip long ol setelmen o wantaim ol wantok na go long wok. Gutpela haus em i wanpela as bilong ol komplek i

kamap long olgeta hap bilong kantri. Ol polisman i sot bikos i no gat inap haus slip bilong ol. Ol tisa i no wok gut bikos i no gat haus bilong ol. Ol nes na dokta i no laik go wok long ol ples longwe bikos i no gat gutpela haus.

Olsem na planti pablik sevan na ol arapela wokman i amamas long taim gavman i tokaut long dispela wik olsem bai givim 2000 fri taitel

bilong graun long ol wokman long sanapim haus bilong ol. Bai ol i stat long Mosbi na Lae long mun Mas na bihain bai i go long wan wan provins. Aninit long hausing program bilong gavman, wan wan bilong 89 distrik bai kisim K1milien long sanapim 10-pela haus bilong ol pablik sevan.

Gavman i putim pinis K200 milien long Bank South Pacific, tasol bikpela salens nau em long ol dispela lain husat i laik kisim taitel.

Ol i mas gat sekyuriti pastaim long ol i ken kisim dispela dinau long benk long sanapim haus bilong ol.

Dispela i gutpela nius we ol manmeri husat i save hatwok longpela taim tru i ken skelim na aplai long sanapim haus bilong ol yet. Gavman i tok dispela program i bilong ol liklik manmeri husat i no kisim bikpela mani tumas.

Yumi hop i gat ol rot bilong sekap gut na i no ken larim ol maniman tasol i kam insait long wokim bisnis long dispela program.

Dispela program bilong helpim ol wokman long kamap papa bilong haus bilong ol yet bai mekim planti pipel i skelim laip bilong ol.

Pasin bilong lukautim gut mani i wanpela rot bilong sevim mani na putim i go long baim haus. Pasin bilong spesim pikinini em i nara-pela rot bilong lukautim gut sindaun bilong famili.

Na pasin bilong bosim gut mani na i no tromei mani nating long ol kain samting olsem bia, smok na buai bai helpim tu long sevim mani.

Gavman i opim rot nau long helpim pipel, orait wan wan manmeri husat i laik stap insait long program i mas helpim ol yet long kisim taitel bilong graun.

## Nupela atoriti gat pawa long distrik

Kamap bilong nupela Distrik Developmen Atoriti insait long kantri bai i ron olsem wanpela bisnis han bilong mekim mani na tu mekim ol wok na developmen insait long ol ilektoret na distrik long kantri.

Palamen i kamapim Distrik Developmen Atoriti (DDA) insait long olgeta 89 ilektoret long kantri. Dispela Distrik Developmen Atoriti bai go pas long olgeta menesmen na ron bilong ol wok insait long wanwan distrik olsem kari-maut ol wok projek na developmen, mekim mani na givim sevis go long ol pipel.

Praim Minista Peter O'Neill i go pas long kamapim dispela lejislesen we i givim laip long kamap bilong Distrik Developmen Atoriti insait long kantri long dispela wik Tunde long haus palamen. Ol memba bin vot na mak long 66 memba bilong palamen bin votim dispela lejislesen long kamap na 18 i egensim.

Ol lain bin egensim em ol Gavana bilong ol provins na ol memba bilong Oposisen



bikos ol tok dispela Distrik Developmen Atoriti nau bai kisim olgeta pawa long sait bilong mani na ol Open memba bai kamap pawaful stret long pawa na disisen bikos ol bai siaman bilong dispela atoriti.

Dispela tu i mekim ol gavana i lukim olsem ol no inap gat pawa long mekim wanpela disisen o kamapim wanpela samting moa long ol distrik bikos atoriti bai go pas long olgeta bisnis bilong distrik na Minista bilong Provin-sel Afeas na Inta Gavman Rilesen tasol bai gat pawa long kontrolim na stopim wok bilong atoriti sapos ol no mekim gut wok o ripot bilong mani i no kamap gut o bagarap.

Ol Gavana i ting olsem ol Lokol Level Gavman Kaunsel

tu bai no gat wok na pawa bilong ol moa na ol bai i no inap interes long kamap long kaunsel bung o ol presiden bai no inap wok gut wantaim ol Gavana bilong ol.

Gavman i sanap strong olsem dispela Distrik Developmen Atoriti bai pulim ol saveman bilong wok go bek long ol distrik level na ol bai ranim dispela nupela bisnis long kirapim na bringim sevis na developmen go daun long ol ples.

Dispela atoriti nau i luk olsem em bai rausim o kisim ples bilong Diistrik Plening na Baset Praioriti Komiti insait long olgeta distrik we i mekim wok bilong ol presiden na kaunsel menesa na husat kaunsel i no gat luksave moa.

Long dispela wik ol kaunsel presiden bilong Morobe provins i mekim bikpela singaut go long O'Neill na Dion gavman long luksave long wok bilong ol kaunsel presiden na givim gut baset bilong ol long dispela 2015 baset. Nau yet em gavman i daunim

baset bilong ol kaunsel presiden go daun long K400,000.

Ol kaunsel presiden i tok ol save wokim o stretim gut ol klinik, haus bilong ol tisa na haus sik woka, stretim ol wara saplai na ol liklik han rot, stretim gut ol bris na planti wok we ol save mekim insait long distrik level.

I luk olsem bai dispela Distrik Developmen Atoriti bai senisim na kisim ples bilong ol kaunsel bikos em bai i gat olgeta mani na pawa bilong mekim wok aninit long siaman bilong memba na kontrol bilong Minista long Waigani.

I gat pret olsem nogut ol distrik husat ol memba bilong ol save sindaun long Oposisen bai i no inap kisim gut distrik fans bilong ol olsem gavman save mekim long daunim na bagarapim ol Oposisen memba o pulim ol memba go long jonim na gavman sait.

Tasol gavman i sanap strong olsem dispela atoriti i gat sistem bilong em yet we em bai ron olsem bisnis.



Published Weekly, Thursday, for Word Publishing Company, Ltd.

P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: [editorial@wantok.com.pg](mailto:editorial@wantok.com.pg)

Websait: [www.wantokniuspepa.com](http://www.wantokniuspepa.com)

**Pe bilong wanpela via. 52 niuspepa**

| Ples:                 | Air:       |
|-----------------------|------------|
| PNG                   | K220.00    |
| AUSTRALIA             | US\$110.00 |
| ASIA PACIFIC na JAPAN | US\$150.00 |
| AMERICA na EUROPE     | US\$210.00 |

General Manager  
Elizabeth Konga

Editor  
Veronica Hatutasi

Published at Able Building Complex, Sec 58 Lot 02, Waigani Drive.

**Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.**



# Nu Yia resolusen bilong sampela manmeri...

## Planti man na meri insait long Pot Mosbi i wok long mekim disisen long senisim wan wan pasin ol i gat long taim bilong Nu Yia.

Joylyne Karato UPNG sumatin i raitim



**Nelson Pain**  
Mi wanpela yangpela mangi bilong Wabag we mi save wok olsem tisa long ol bikpela skul olsem ol yunivesiti. Taim bilong kisim fe, mi no save silip long haus.

Mi save spendim wiken bilong mi wantaim ol poro bilong mi long ol seteleman dring bia. Nau 2015 mi save olsem em i no gutpela pasin so mi mekim disisen long lusim bia na go long sios na lotu. Mi tok save long ol bia meit bilong mi olsem mi lusim bia. Sapos yupela laik dring, mi tok gut lak na wisim yupela long dring bia.



**Tipilwan Louvii**  
Mi wanpela komitet yut long Seven De we mi save feifful long lotu taim mi stap long ples.

Taim mi kam holide long Mosbi Siti mi wok long lusim lotu planti taim na tingting bilong mi kotim mi.

Long 2015 mi bai stat long go lotu olsem mi save mekim long ples.



**Johna Yakuman**  
Pastaim mi save stap olsem Pasto na tu Evenjelis long Lutren Sios tasol mi lusim na biket raun. Olgeta nugut pasin yumi tingim long em ,mi mekim.

Nau nupela yia na mi mekim disisen long lusim olgeta pasin nugut na mi go bek long orijinal ples bilong mi.

**Elias Pipi Kom**  
Olgeta Nu yia mi save wokim disisen we mi yet save stap antap long disisen mi mekim. Las yia mi lusim smok na nau mi



wokim disisen long lusim bia. Mi save olsem bia em i as bilong famili problem na mi mekim disisen olsem 2015 bai mi lusim bia.



nupela rosolusen bilong mi olsem mi bai lusim buai. Mi save lotu tasol mi save soim liklik amamas tret long kaikai buai tasol siti rul i tambuim yumi long kaikai buai, na tu prais bilong wapela buai em tu kina. Mi pilim pen long rausim 2Kina long giaman so of tasol ya mi lusim nau.



**Jenny Apo**  
Mi em wanpela kaks meri long drink bia. Lotu em mi save lotu tasol taim bilong dring em mi save tingim olsem wanpela nomal wara, tasol long 2015 mi laik statim nupela yia wantaim gutpela pasin. Nau mi lusim bia na go long lotu tasol.

## Dispela Krismas selebresen winim ol narapela

Polis Komisina Geoffry Vaki i tok em i amamas long dispela krisma we no gat planti hevi i kamap olsem ol arapela krismas.

Komisina i tok olsem em i gutpela long ol i stopim bia long ol setelmen insait long Pot Mosbi na tu long ol narapela eria long PNG we em i kisim bikpela helpim long taim bilong krismas.

Em i tok ol polis tu i hatwok long mekim lo na oda i wok strong long dispela krismas we nau yumi lukim hanmak bilong-gol wok yumi mekim long daunim ol hevi long dispela krismas.

Komisina i amamas tu long ol man na meri long dispela kantri long gutpela pasin long krismas na em i tokim ol long kirapim dispela wankain spirit long ol narapela krismas bihain.

Polis bai wokabaut raun long ol setelmen na painimaut husat i salim bia, na tu ol bai sekim ol



Polis Komisina Geoffry Vaki

kar long painim husat man i dring na draivim kar long lukim bikpela senis insait long siti.

Vaki tu i tok strong long ol polis long ol i no ken salim ol paia kreka na ol paia ams long liklik mani we dispela kain samting bai distebim ol na lo i no tok orait long pairapim nating.

Em i tok ol bai stopim dispela kain ol paia kreka na tu rausim ol stua husat i salim ol dispela kain ol pairap samting.



SANAP YET: Maski Hevi na pait long Bogenvil i bin kamap na planti samting i bagarap, dispela Wol Woa 2 Memoriel Pak long Kieta i sanap yet. Wanpela long ol em dispela hap long balus bilong Japan i sanap gut yet. Poto: Veronica Hatutasi





Program bilong Wanwan De

**De - Mande - Fraide**

6am - 10am - Sankamap show - Host: Kas.T  
 6:00am - Major Nius Bulletin  
 6:15am - Komuniti Notis Bod  
 6:25am - Taim Bifo - wanpela singsing blong bifo.  
 6:30am - Nius Hetlains  
 6:45am - Bonde grins  
 7:00am - Major Nius Bulletin - YUMIFM Nius Senta  
 7:05am - YU TOK - komiuniti awenes program  
 7:15am - WAN 4 DA ROAD - Hit Prediction - niupela singsing  
 7:30am - Tok Pilai - stori blong putim smail long nus pes.  
 8:00am - Major Nius Bulletin - YUMIFM Nius Senta  
 8:05am - YU TOK - komiuniti awenes program  
 8:15am - "Papa Heni Fuka Show".  
 9:00am - Nius Bulletin - YUMIFM Nius Senta  
 9:15am - Luksave long Komuniti (Radio Pilai) Fraidei

Tasol  
 9:30am - Final aua cruz  
 10am - 3pm - Morin Trek na Belo Pack - Host: Mummy DASH  
 10:00am - Major Nius Bulletin - YUMIFM Nius Senta  
 10:05am - YU TOK - komiuniti awenes program  
 10:15am - Kona blong yu.  
 10:45am - YUMI PANIM WOK Segment  
 11:00am - Nius - YUMIFM Nius Senta  
 11:05am - YU TOK - komiuniti awenes program  
 11:10am - Lukautim yu yet - Helt toktok  
 11:30am - Nius Hetlains blong Belo Taim - Laik blong yu - Niupela singsing previu  
 12:00pm - Major Nius Bulletin - YUMIFM Nius Senta  
 12:05pm - YU TOK - komiuniti awenes program  
 12:10pm - BELO Pack - Belo taim rekwas na dedikesen  
 12:15pm - Komuniti Notis Bod  
 12:20pm - BELO Pack - Belo taim rekwas na dedikesen  
 1:00pm - Nius - YUMIFM Nius Senta  
 1:05pm - YU TOK - komiuniti awenes program  
 1:10pm - BELO Pack - Belo taim rekwas na dedikesen

2:00pm - Major Nius Bulletin - YUMIFM Nius  
 2:05pm - YU TOK - komiuniti awenes program  
 2:45pm - YUMI PANIM WOK Segment  
 3pm - 7pm - Avinun Draiv Taim - Host: Vaviessie  
 3:00pm - Nius - YUMIFM Nius Senta  
 3:05pm - YU TOK - komiuniti awenes program  
 3:10pm - Avinun cruz  
 4:00pm - Nius - YUMIFM Senta  
 4:05pm - YU TOK - komiuniti awenes program  
 4:10pm - FOAPELA KAM GUD LONG 4 - foapela singsing  
 4:30pm - Nius Hetlains  
 4:45pm - YUMI PANIM WOK Segment  
 5:00pm - Major Nius Hetlains - YUMIFM Nius Senta  
 5:05pm - YU TOK - komiuniti awenes program  
 5:10pm - 6:00pm - KULCHA Musik (1 hr) skelim lokal musik 6pm - 7pm  
 - NAIT BEAT - Host: Vaviessie  
 6:00pm - MAJOR NIUS BULLETIN - YUMIFM NIUS SENTA  
 6:05pm - YU TOK - komiuniti awenes program

6:10pm - 7:00pm Mon kamap sho  
 6:45pm - Komuniti Notis Bod  
 7:00pm - 9:00pm - COCA COLA GARAMUT - Host: Angra Kennedy  
 7:00pm - Nius - YUMIFM NIUS SENTA  
 7:05pm - YU TOK - komiuniti awenes program  
 9:00pm - 00am - Nait Beat - Isi Cruz long nait  
 00am - 6am - BRUKIM TULAIT SHOW - Host: Tuluvan Vitz/Talaigu Sopi/Bata Rat  
 00:00 - Early Monin Taim Cruz (ol lain brukim tulait shift)  
 - Musik / Request / Tok pilai  
 - Kipim Kampani long ol nait shift.  
**Wikens - Sarere**  
 6am - 10:00am - Wiken Sanrais Host: Talaigu Sopi  
 7am - 9am - Sarere Monin Cruz  
 9am - 11am - Monin Treks  
 11am - 1pm - National Weekly Hit Parade - Host: Kasty - 1st aua NWHP  
 12:00pm Nius - YUMIFM Nius Senta  
 12pm - 1pm - 2nd aua NWHP

Sarere belo cruz - Host: Tuluvan Vitz  
 1pm - 2pm - Sarere Belo Taim Dedikesen  
 2:00pm Nius - YUMIFM Nius Senta  
 2pm - 6pm - Sarere Avinun Cruz  
 6:00pm Nius - YUMIFM Nius Senta  
 6pm - 00:00am - Nait beat  
 7pm - 9pm - Coca Cola Garamut  
 9pm - 00:00am - Nait cruz  
 00:00am - 6am - Brukim Tulait Show  
**Wiken - Sandei**  
 6am - 10am - Wiken Sanrais / Sandei Monin wokabout Musik  
 - Monin Treks  
 10am - 12noon Nius - YUMIFM Nius Senta  
 12noon - Sandei Belo Taim Music  
 12 - 2pm Nius - YUMIFM Nius Senta  
 2:00pm - Sandei Avinun Draiv Musik  
 2pm - 6pm - Nius - YUMIFM Nius Senta  
 6pm - 8pm - GOSPEL REKWES AUA  
 8pm - 00:00am - Late Nait Cruz - Poroman Aua  
 00:00am - 6am - Brukim Tulait Show  
**Program Director - YUMIFM - Kasty**

**RADIO AUSTRALIA TOK PISIN PROGRAM HARIM LONG: 101.9 FM**

6AM Stesen Op - Nius Hetlain - Musik na ol intaviu  
 6.30AM Nius na Karent Afes  
 7AM Stesen Pas  
 7PM Stesen Op  
 7.01PM Ol Hetlain na Program Priviu  
 7.15PM Spots  
 7.30PM Nius na Karen Afeacs  
 8PM Helt  
 8.15PM Musik  
 8.30PM NIUS  
 8.40PM Spots Riplei  
 8.55PM Musik  
 9PM Stesen Pas

**TUNDE - Moning - Nait**  
 6AM Stesen Op - Nius Hetlain - Musik na ol intaviu  
 6.30AM Nius na Karent Afes  
 7AM Stesen Pas  
 7PM Stesen Op  
 7.01PM Ol Hetlain na Program Priviu  
 7.15PM Musik na Chit-Chat  
 7.30PM Nius na Karen Afeacs  
 8PM Mama Graun  
 8.15PM Musik/Spots  
 8.30PM NIUS  
 8.40PM Helt Riplei  
 8.55PM Musik  
 9PM Stesen Pas

**TRINDE - Moning - Nait**  
 6AM Stesen Op - Nius Hetlain - Musik na ol intaviu  
 6.30AM Nius na Karent Afes  
 7AM Stesen Pas  
 7PM Stesen Op  
 7.01PM Ol Hetlain na Program Priviu  
 7.15PM Musik na Chit-Chat  
 7.30PM Nius na Karen Afeacs  
 8PM Focus  
 8.15PM Musik/Spots  
 8.30PM NIUS  
 8.40PM Mama Graun Riplei  
 8.55PM Musik  
 9PM Stesen Pas

**FONDE - Moning - Nait**  
 6AM Stesen Op - Nius Hetlain - Musik na ol intaviu  
 6.30AM Nius na Karent Afes  
 7AM Stesen Pas  
 7PM Stesen Op  
 7.01PM Ol Hetlain na Program Priviu  
 7.15PM Musik na Chit-Chat  
 7.30PM Nius na Karen Afeacs  
 8PM Youth  
 8.15PM Musik/Spots  
 8.30PM NIUS  
 8.40PM Focus Riplei  
 8.55PM Musik  
 9PM Stesen Pas

**FRAIDE - Moning - Nait**  
 6AM Stesen Op - Nius Hetlain - Musik na ol intaviu  
 6.30AM Nius na Karent Afes  
 7AM Stesen Pas  
 7PM Stesen Op  
 7.01PM Ol Hetlain na Program Priviu  
 7.15PM Musik na Chit-Chat  
 7.30PM Nius na Karen Afeacs  
 8PM Wantok  
 8.15PM Musik  
 8.30PM NIUS  
 8.40PM Youth Riplei  
 8.55PM Musik  
 9PM Stesen Pas

**SARERE - Nait**  
 7PM Stesen op - Ol Nius Hetlain/Program Priviu  
 7.05PM Musik na Chit Chat  
 7.30PM Nius  
 7.40PM Wantok  
 8PM Lokal Ben  
 8.30PM Nius  
 8.40PM Musik/Chit Chat  
 9PM Stesen Pas

**SANDE - Nait**  
 7PM Stesen op - Ol Nius Hetlain/Program Priviu  
 7.05PM Musik na Chit Chat  
 7.30PM Nius  
 7.40PM Femili Blong Serah (Radio Plei)  
 8PM Lukluk Bek Long Wik  
 8.30PM Nius  
 8.40PM Musik/Chit Chat  
 9PM Stesen Pas

*Raun wantaim Wantok kru ...*

**Michael Learns to Rock bai kam long PNG**

Stori na poto i kam long Wikipedia

**WANPELA biknem musik grup long wol bai kam long PNG neks wik na singsing long Lamana Gol Klap, Mosbi.**

Michael Learns to Rock (MLR) em dispela biknem singa bilong kantri Denmak long Yurop.

Grup i gat tripela singa long en na em long singa na kibot pilaia, Jascha Richter i bin bung wantaim haikul poro bilong em, drama Kare Wanscher long Aarhus, Denmak. Ol i lukim olsem tupela yet i no inap na ol i kisim gitaman, Mikkel Lentz husat i bin pilai wantaim grup bilong en, Rocking Studs. Namba 4 memba, Soren Madsen i wanpela gitaman em ol i kisim em olsem beis gita pilaia.

Grup i bin kam wantaim na prektis long yia 1988 na long September 1991, ol i bin autim namba wan album bilong ol, "My Blue Angel" we i no bin mekim gut tumas long wol musik sat. Tasol narapela album, "The Actor" na singsing, "I Still Carry On" i bin topim musik sat long Denmak, Sweden, Indonesia, Malesia, Singapore na Filipins na salim 25,000 kopi we i mekim album i kisim level bilong gol. Long Oktoba 1993, namba tu album, "Colours", i bin kam gut stret na ol i bin salim

1.1 milien rekot. Dispela album i bin kisim nem bilong MLR i kamap bikpela tu long PNG wantaim singsing, "My Sleeping Child," "25 Minutes", "Out of the Blue" na moa. Ben i bin wokim raun long Esia na kisim "Best Performing ekta of the Year" awat long 1994 long singsing, "25 Minutes."

Bihain long dispela, na long ol yia i kam, grup i mekim gut na kamap wantaim moa album, na raun long Brasil, Saut Afrika, Yunaitet Arab Emirets, Yunaitet Kingdom, Saina, ol kantri long Far Is na Japan.

Long 1998, ol i bin kisim liklik malolo na stap wantaim ol famili bilong ol na tu, raitim ol nupela singsing. Long malolo bilong ol, ol i bin laik bruk, tasol ol i no mekim. Wanpela tasol, Soren Madsen i bin lusim ol na go em yet. Long 2004, grup i bin kam wantaim gen na lusim nem, MLT na kolim ful nem, Michael Learns to Rock.

Grup i kisim nem olsem wanem? Singa na kibot pilaia, Richter i tok taim ol i wokim demo teip long salim i go long Rock Grand Prix resis long Aarhus, em i mas kamap wantaim wanpela nem. Na em i salim "Michael Learns to Rock" olsem man i salim dispela demo teip. Richter i tok wanpela lain long Inglis teksbuk bilong em i bin putim tingting long kamapim dispela nem long



go insait long rok konset na tu, Michael Jackson i narapela. Em i tok planti taim, em i no wanbel long dispela nem, tasol grup i bin mekim gut na nem bilong ol i pairap hariap na ol i kisim biknem, na olsem, nem i stap na ol i go het long mekim gut inap

na. Nau PNG bai lukim na harim ol gutpela stail musik, nek, na singsing na kain stail bilong ol long Lamana Gol Klap long Sarere nait, Januəri 17. Yu laik save moa, askim Lamana Hotel long prais bilong tiket samting.

**EMTV Television Guide**

**FONDE JANUERI 8, 2015**

8:40 PMG **HOT SPOT Ep#33**  
 9:10 PM PG **ELITE MUSIC ZONE #31**  
 9:40 PM G **NEWS REPLAY**  
 .....followed by the Australia Network

SLEEPOVER CLUB S1 EP#11/26  
 SHAK S6 EP#1/40  
 5:30 PM G **SKIPPY - Puppets**  
 5:55 PM G **CRIME STOPPERS**  
 6:00 PM G **EMTV NATIONAL NEWS**  
 7:00 PM G **IN MORESBY TONIGHT - ALERT THREATENED SPECIES**  
 7:30 PM PG **FRIDAY NIGHT MOVIE**  
 8:30 PM MA **EMTV NEWS REPLAY**  
 10:00PM G **EMTV NEWS REPLAY**  
 .....followed by the Australia Network

7:30 AM G **AUSTRALIA NETWORK**  
 8:30 AM G **SKILLICIOUS S2 EP#7/7**  
 9:00 AM G **DANI'S HOUSE S2 EP#2/12**  
 9:30 AM G **ULTIMATE GUINNESS WORLD RECORDS - EP#31/52**  
 10:00 AM G **PACIFIC WAY EP#16 - Rpt.**  
 10:30 AM G **SKIPPY - Puppets - Rpt.**  
 11:00 AM G **AUSTRALIA NETWORK**  
 5:30 PM G **OLSEM WANEM EP#39**  
 6:00 PM G **EMTV NATIONAL NEWS**  
 6:30 PM G **SECRET MILLIONAIRE USA - RAIT MUSIK repeat**  
 7:30 PM G **MOVIE - RISKY BUSINESS**  
 10:00 PM G **EMTV NEWS REPLAY**  
 .....followed by the Australia Network

3:30 AM G **AUSTRALIA NETWORK**  
 6:30 AM G **EMTV NEWS REPLAY**  
 7:00 AM G **HILLSONG**  
 7:30 AM G **AUSTRALIA NETWORK**  
 9:00 AM G **BUSINESS PNG YR.3 EP#38 rpt.**  
 9:30 AM G **AMAZING SPIES Ep #4**  
 10:00 AM G **OLSEM WANEM EP#39 - RPT**  
 10:30 AM G **RESOURCE PNG EP#37 - Rpt.**  
 11:00 AM G **ITALIAN KHANNA Ep #2**  
 11:30 AM G **ITALIAN KHANNA Ep #3**  
 12:00 PMG **AUSTRALIA NETWORK**  
 5:30 PM G **LOVE PATROL S6 Ep #02**  
 6:00 PM G **EMTV NATIONAL NEWS**

**FRAIDE JAUNERI 9, 2015**

4:00 AM G **AUSTRALIA NETWORK**  
 5:00 AM G **JOYCE MEYER 1099-5**  
 5:30 AM G **EMTV NEWS REPLAY**  
 6:30 AM G **TODAY**  
 09:00 am G **CLASSROOM BROADCASTS**  
 3:30PM G **KIDS KONA**  
 HI 5 S12 EP#38/39  
 NEW MACDONALD'S EP#51/52

**SARERE JANUERI 10, 2015**

4:30 AM G **AUSTRALIA NETWORK**  
 6:00 AM G **EMTV NEWS REPLAY**  
 7:00 AM G **IN HIS STEPS EP#33**

**SANDE JANUERI 11, 2015**

6:30 PM G **VOCAL FUSION S1 - Ep#11**  
 7:30 PM G **TOK PIKSA - EP#2014/44**

4:30 AM G **AUSTRALIAN NETWORK**

5:00 AM G **JOYCE MEYER 1099-4**  
 5:30 AM G **EMTV NEWS REPLAY**  
 6:30 AM G **TODAY**  
 09:00 am G **CLASSROOM BROADCASTS**  
 3:30 PM G **KIDS KONA**  
 HI 5 S12 EP#37/39  
 NEW MACDONALD'S EP#50/52  
 SLEEPOVER CLUB S1 EP#10/26  
 SHAK S5 EP#33/33

5:30 PM G **PACIFIC WAY EP#16**  
 6:00 PM G **EMTV NATIONAL NEWS**  
 7:00 PM G **RAIT MUSIK EP#232**  
 8:00 PMG **RESOURCE PNG EP#37**  
 8:30 PM G **SOKA XTRA EP#31**



TORO



BIABIA



KANAGE



KROSWOD

- Antap 1 Laikim tumas 5 Pasin bilong ol Indonesia long putim kala long laplap 10 Pis 11 Wara 12 Bihain tru 14 Susa 17 Bilum bilong 18 Musik instramen 20 Kukim long plaua 21 Lait i 23 Mani bilong wok 24 Tudak 27 Pawa masin 30 Kai kai go insait long en 31 Kain gras 32 Long taim bilong Jisas 33 Redio 35 Namba 36 Melanesian Alaiens Pati 37 Mak bilong kompas 38 Narapela lain 39 Pilim nogut 40 Lusim ples 42 Han bilong Australia gavman 44 Ailan long Maikronesia 46 Vinega 49 Wankain skoa long spot 50 Toksave pepa bilong baim dinau 51 Teknikel nokaut long boksen 52 Solwara i kirap 53 Provins bilong ol Miok 54 Ailan long Bogenvil 55 Ples ol sumatin i kisim save Daunbilo 1 Pilai 2 Bilong sevim maugras 3 Putim i go antap 4 Opisal buk bilong raun ovasis 5 Pren 6 Bilong lukluk 7 Televisen 8 Yau 9 Biktaun bilong Morobe 13 Salim mani kwik long pos opis 15 Namba 16 Mande em wanpela 19 Hait na lusim ples 20 Ples long Isten Hailans 22 Bilong rait 23 Sampela ka gat dispela kain gia 25 Siksti minit 26 I no hatwok 27 Wara bilong prut 28 Namba 29 Namba wan man 31 Redio stesin 34 Ol rul 37 Salim toktok long mobail 40 Kontrolim spit bilong ka 41 Senia plisman 43 Ol soldia 45 Tuna 47 Hap diwai 48 Ailan long Is Sepik 50 Boil

SUDOKU

9x9 Sudoku grid with numbers 1-9.

Ansa bilong las wik Sudoku # 75

9x9 Sudoku grid for puzzle #75.

Ansa bilong Sudoku # 76 neks isu

Crossword puzzle grid with words like MANGI, ANITUA, G, AITOI, N, ILO, SKUL, LING, YES, D, K, SOP, M, UN, S, EM, SAN, N, KON, TEKS, MOBA, I, L, DE, AP, I, EIT, WAS, AIDIA, B, SIS, IS, K, ISI, PEN, B, KAS, N, SAN, A, P, I, O, SOSIS, EN, KUMU, A, URITA, A, A, TANG, NO, I, SUS, A, MI, SA, IS.

Ansa bilong las wik kroswod, isu # 2103

Large crossword puzzle grid with numbered squares.

EMTV Television Guide

Table with EMTV program schedules for Jan 6 and Jan 7, 2015, including times and program titles like KIDS KONA, JOYCE MEYER, and TUNDE JANUERI 6, 2015.

Ol Progam na Kilok i ken tenis oltaim...





# TOK PISIN NEWS

from Radio Australia

radioaustralia.net.au

Harim TOK PISIN long  
Radio Australia  
**101.9FM**  
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)



Bikpela win i bagarapim Solomon Ailan. Poto i soim olsem solwara i katim graun na kam insait long ailan. Poto: ABC

## Solomon Ailan i mas gat wanpela Indipenden Anti-Korapsen Komisnin

Transparensi Solomon Ailan we i sanap strong egensim korapsen long kantri i laikim gavman i mas kirapim wanpela independen lain long pait egensim korapsen long kantri.

Transparensi Solomon Ailan (TSI) i laik kantri i mas gat wanpela independen komisnin egensim korapsen, eksekutiv opisa bilong TSI, Daniel Fenua i tok.

Lain i save was egensim korapsen long Solomon Ailan i mekim pinis bikpela askim i go long gavman long kirapim wanpela Independen Komisnin Egensim Korapsen long kantri.

Eksektiv opisa bilong TSI, Daniel Fenua i mekim dispela askim bihain long gavman i bin makim wanpela minista em ol i sutim long en olsem em i no gutpela tumas.

TSI i tok tingting bilong gavman long makim Bodo Dettke olsem Minista bilong Forestri na Ristets i no stret long wanem dispela minista em i wanpela bisnisman long loging indastri.

Ol narapela non gavman organaisesen (NGO) tu long kantri i no wanbel long tingting bilong Praim Minista long makim Mista Dettke long dispela wok.

Ol i sutim tok long en olsem em i bin mekim sampela pasin bipo long sait bilong loging olsem na ol i wari long em i holim wok bilong Minista bilong Fores.

## Simbu i no laikim ol drag

Polis long Simbu i tokaut long ol pipel long no ken bringim mariwana na ol arapela drag i go insait long provins.

Provinsal Polis Komanda bilong Simbu, Sief Inspekta Michael Welsh i tok ol narapela ples long Papua Niugini i no ken hait na bringim ol drag nogut i go long Simbu.

Sief Inspekta Welsh i mekim dispela toktok bihain long ol i bin pulim kalabusim wanpela man bilong Isten Hailans provins husat i bin hait na bringim sampela spak mariwana i go long Simbu.

Sief Inspekta Welsh i tok, dispela kain drag i save gro gut long provins, na em i no isi long ol i rausim olgeta. Tasol em i tok em i no laik ol pipel bilong autsait i karim dispela drag i go long provins.

Em i tok tu olsem, ol i wok long traim long daunim tu pasin bilong mekim na yusim hom bru na ol kain kain dring bilong spak we ol i save wokim long ples.

## Taim nogut long Solomon Ailan

Solomon Ailan nau wok long painim taim nogut we bikpela ren na strongpela win i kamap long sampela hap bilong kantri.

Dairekta bilong Solomon Ailan Meterolojik Sevis, David Hirasia i tok sampela hap blong kantri nau i gat bikpela solwara, strongpela win na planti ren.

Em i tok Met sevis i givim tok lukaut pinis long pipel long ol eria bilong antap long kantri olsem Choiseul, Isabel na Ontong Java.

Mista Hirasia i tok ol i givim tok lukaut long bikpela ren tu long sampela hap long kantri.

## Solomon Ailan i bin gat gutpela Krismas na Nu Yia

Ol polis long Solomon Ailan i tok amamas long kantri i stap gut long taim bilong Krismas na Nu Yia.

Deputi Komisina bilong Polis Operesen Selwyn Rotu i tokim ABC olsem dispela i wankain long Honiara na ol arapela provins long kantri.

Em i tok planti long ol trabel we i bin kamap long dispela taim em pasin bilong dring ol strongpela dring.

Em i tok dispela i bin kamapim tu sampela trabel olsem domestik vailens.

Tasol Mista Rotu i tok operesen bilong ol polis long Honiara na olgeta hap bilong kantri we i pinis long dispela moning i bin wanpela gutpela wok.

Em i tok tenkyu long gutpela wok bilong ol polis na ol pipel long kantri long gutpela selebresen long taim bilong Krismas na Nu Yia.

## Bogenvil baset na taim i narakain long PNG

Palamen bilong Atonomus Rijen bilong Bogenvil (AROB) i bin gohet long sindaun na paitim toktok long 2015 Baset bilong en.

Aloysius Laukai bilong New Dawn FM i tokim ABC olsem aninit long lo, Atonomus Bogenvil Gavman (ABG) i mas gat wanpela baset long 31 long Desemba.

Olsem na Palamen i bin bung long paitim toktok long baset we i karamapim K127.9 milien long Recurrent Grant, K19 milien long intenel revenu, developmen grant bilong K160 milien, na K249 milien pablik sevis grant.

Narapela bikpela stori bilong Bogenvil tu em AROB nau

lusim taim jon bilong Papua Niugini na i gat wankain taim olsem Solomon Ailan.

Mista Laukai i ripot olsem planti pipel long Bogenvil i amamas tru long ABG i senisim taim bilong en.

Ol i tok dispela i mekim ol i gat planti moa taim long mekim wanem wok o pilai o wanem samting ol i laik wokim.

## Pot Mosbi i stap isi long Krismas

Polis long NCD i amamas long gutpela pasin bilong pipel long taim bilong Krismas.

NCD Metropolitan Polis Suprintenden Andy Bawa i tokim ABC olsem i kam inap nau, i no gat wanpela bikpela trabel i bin kamap long siti.

Em i tok spesel operesen bilong ol polis long dispela holide taim i gohet yet.

Suprintenden Bawa i askim olgeta pipel na komyuniti insait long NCD long gohet long bihainim lo, taim ol i wokim selebresen bilong ol.

Em i tok Pot Mosbi i bin stap isi tru i kam inap nu yia na ol polis i laik lukim dispela pasin i gohet insait long nupela yia.

## Guadalcanal Provins bai gat strongpela gavman

Ol pipel bilong Guadalcanal Provins long Solomon Ailan i gat strongpela tingting olsem ol bai gat wanpela strongpela gavman nau long wokim gutpela wok long provins.

Presiden bilong Guadalcanal Kaunsil ov Wimen Mary Bolen na Transperensi Solomon Ailan Philip Manakako i toktok wantaim Sam Seke bilong ABC

Ol i tok ol pipel bilong Guadalcanal Provins i gat strongpela tingting olsem ol bai nau gat wanpela strongpela gavman long wokim gutpela wok long provins.

Na Misis Bolen i tok sikispela meri olgeta i bin sanap long Guadalcanal Provinsal Ileksen em i bin kamap pastaim long dispela mun, tasol no gat wanpela long ol i bin win.

Em i tok tu olsem em i no isi long ol meri long resis egensim ol man husat i gat mani na risos.

Em i tok sampela pasin korapsen tu i bin kamap long taim blong ileksen.

Misis Bolen i tok i mas gat planti moa awenes i kamap long sait bilong lidasip long kantri.





# Ramu NiCo Projek sanap strong yet long 2014

**P**RESIDEN bilong Ramu NiCo Menesmen (MCC) di-velopa bilong bikipela nikel/kobalt projek long Madang, i tok maski olsem prodaksen i wok long gohet long tupela yia nau, Ramu NiCo i wok long bungim bikipela hevi long sait long mani, na teknikal salens, na tu prais bilong nikel long wol maket i stap daunbilo. Olsem na em i askim ol stekholda long luksave long dispela ol hevi na salens na sanap strong na sapotim projek.

Mista Wang i tok amamas i go long ol stekholda husat i karamapim ol lain makim Madang provinsal gavman, polis, ol bisnis, ol wokmanmeri bilong Ramu NiCo na tu ol foapela papagraun asosiesin siaman na ol eksekutiv bilong ol long helpim long bringim projek i kam kamap tude.

"Long makim maus bilong Ramu NiCo na MCC Grup, mi laik kisim dispela taim long tok tenkyu long yupela wan wan, na tu arapela long sapot yupela i givim long Ramu NiCo Projek. Wantaim sapot bilong yupela, mipela i wokabaut i kam kamap na lukim Projek developmen i kamap gut tude," Mista Wang i tok.

Em i tokaut olsem ol teknikal hevi long wok bilong masin na ol arapela samting i stap yet na gret bilong nikel prosesing i hat long kain teknoloji kampani i wok long yusim. Narapela samting tu em prais bilong nikel long wol maket bilong metail prais em i stap daunbilo na kos bilong operesen em i antap moa. Ol dispela samting i givim bikipela salens tru long Ramu NiCo.

"Maski olsem dispela ol salens na hevi i stap, mipela i traim hat tru long muv i go fowat wantaim sapot bilong yupela na mipela i gat strongpela tingting na bilip long abrusim dispela ol hevi long ol yia i kam na kamapim gutpela wok na bringim helpim i go long ol stekholda na bringim ol helpim we mipela i mas wokim," Mista Wang i tok.

Mista Wang i tok Projek nau yet i go het yet long testim ol wok masin bilong en na long las yia wokmak bilong ol test i bin stap long 30 pesen mak, tasol long dispela yia em i wok test long sait long prodaksen i go antap long 60 pesen mak wantaim gutpela prodaksen mak. Tasol i gat ol teknikal salens tu i stap na kos bilong prodaksen i antap na i sloim o mekim Projek i go isi isi long lukim stret mak bilong prodaksen.

Mande Ogas 4, 2014 em wanpela de we i no gutpela tumas long sotpela laip taim bilong Ramu NiCo

Wok maining long Ramu NiCo KBK Main.



Krein i lodim ol MHP long Basamuk bris.

Ramu NiCo HSE woklain sekim Ramu riva.

Menesman (MCC) Limited, taim i bungim bikipela bagarap stret taim ol plesman i go insait long main eria na kukim ol masin bilong wok maining we moni-mak bilong en em moa long US\$5.05 milien.

Wok i bin stop tupela de na i kirap gen long Trinde, Ogas 6.

Dispela bagarap kampani i bungim em Gavman bilong Saina na PNG i luksave pinis. MCC Grup long Saina na ol arapela stekholda tu i luksave olsem Ramu NiCo Projek em bikipela samting tumas, na wok i mas go het, maski hevi i bungim em.

MCC Grup, husat em mama kampani bilong Ramu NiCo i bin salim wanpela spesel tim long tok-tok wantaim ol lain bilong PNG Gavman, na ol i bin mekim lukluk raun i gol ong KBK Main na Basamuk Rifaineri long Sarere, Ogas 9.

Gavman bilong Saina i tokaut olsem maski olsem Prodaksen i go bek nomal gen, em i askim Gavman bilong PNG long lukluk moa long banisim ol birua na lukautim sefti bilong projek na ol wokmanmeri.

Kampani i luksave olsem dispela projek em bikipela samting long helpim ekonomi bilong PNG, ol stekholda, join vensa patna na ol

papagraun. Olsem na maski olsem kampani i lusim bikipela mani, em i sanap yet long wok strong i go bungim stret prodaksen mak bilong dispela yia 2014.

Ramu Project kodineta wantaim Mineral Risoses Atoriti (MRA, Carter Oiee, i tokaut long dispela yia olsem Ramu NiCo Projek i bringim planti ol nupela kain senis long laipstail bilong ol pipel insait long ruel komyuniti long Usino-Bundi na Raikos distrik long Madang provins.

Long dispela yia 2014 i lukim tu nesenel gavman i sanap strong yet long sapotim Ramu NiCo Projek na i laik lukim tupela distrik we projek i stap long en em, Usino-Bundi na Raikos na tu Madang provins i kisim helpim yet i kam long dispela wanpela nikel kobalt projek tasol long provins.

Long soim sapot bilong en, nesenel gavman aninit long Ramu NiCo Projek Memorandum ov Agrimen (MOA) stat long 2011 i kam 2014 i givim K13 milien long ol infrastraksa developmen insait long dispela tupela distrik na provins.

Mista Oiee i tok nesenel gavman i bihainim ol komitmen bilong en na bringim kamap namba wan hap wok long stretim Raikos Haikul

wantaim moni mak olsem K1.1 milien. Namba tu hap bilong wok long stretim Raikos Hai Skul i lukim nesenel gavman i givim K1.26 milien, na wok ya i pinis long mun Ogas long dispela yia.

Em i tok tu olsem wok long wokim kamap nupela Ganglau Helt Senta em go het yet na nesenel gavman i givim K2.8 milien.

"Mipela long gavman i wokim kamap 8-pela haus bilong ol polisman long Walium, mipela baim tupela polis kar, mipela putim mani long stretim Not Rot long Banu i go long Daunagar, na givim mani long stretim Saut Rot stat long Banu i go long Brahman, na tu mipela givim mani long stretim Walium polis stesin," Mista Oiee i tok.

Em i tokaut tu olsem i no long taim i go pinis MRA i bin givim wanpela kontrak i go long lenona kampani, KBK Limited long wokim kamap 15 haus long Enekuaiu na Danagari we moni mak bilong en inap long K2.5 milien. Antap long dispela gavman i givim K500,000 long konstraksen bilong Baiya bris long Usino-Bundi distrik.

Mista Oiee i tok nesenel gavman i bin givim K2.8 milien olsem Lenona Asosiesen Gren stat long

yia 2000 inap nau, na taim kampani bai baim royalty. Gavman i givim tu K1milien olsem Bisnis Developmen Grent long yia 2009.

Mista Oiee i tok olsem nesenel gavman i wokim komitmen pinis aninit long MOA long kamapim ol bikipela projek olsem stretim rot namel long Banu/Brahman/Pandambai/Mondia rot long Usino-Bundi distrik, na tu Erima/Basamuk/Saidor rot, bris na ol riva krosing long Raikos distrik. Antap long dispela i gat komitmen i stap long wokim kamap Usino/Yal/Kokun/Trens-Gogol Haiwe, Basamuk taun/industrial growth senta na Usino taun/industrial growth senta

Mista Oiee i tok dispela ol projek bai gat fisibiliti stadi i kamap long en insait long 2015 Nesenel Baset. Bi-hain long fisibiliti stadi i kamap, ripot bai go long nesenel gavman long givim mani long kamapim wok long 2016 na projek wok stret bai i kamap.

Em i tokaut olsem ol komitmen o wok nesenel gavman i mas wokim aninit long MOA i kamap pinis, tasol ol arapela i no yet em bai lukluk long en na kamapim wok stret bi-hain.

## Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikipela wok konstraksen long namba tu hap bilong 2008. I kam inap nau, olgeta bikipela konstraksen wok long Krumbukari main sait na Basamuk rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikipela projek olsem, na i daunim olgeta

salens bilong graun na masin bilong mekim wok.

**Ol dispela namba i soim klia mak bilong wok mipela i pinisim:**

- Moa long 4.5 milian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil biding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

**Wanpela  
Ramu NiCo,  
Wanpela  
Komyuniti**



# Saut Flai traिम planim rais

Stori na poto i kam long  
The Fly Breeze, OTDF

GROIM rais long PNG em wanpela bikpela salens. Long planti hap long kantri, planti lain i traिम long planim rais. Long sampela hap rais i gro gut tasol kaikai bilong em i save liklik tru. Sampela hap i gro gut we bai karim gutpela kaikai tasol ol binatang i bagarapim.

Planti risets wok na teknoloji bilong rais i helpim long daunim sampela hevi bilong groim rais na lukim rais i gro gut long sampela hap na i karim bikpela kaikai.

Wanpela gutpela eksapel em, rais faming projek long CMCA Model Viles bilong Samarai long Kiwaba Rijon long Saut Flai distrik long Westen provins.

Ol lokal komyuniti long hap i givim graun long olupela ples balus i go long Ok Tedi Developmen Faundesen (OTDF) long statim rais faming program.

Ol wokman bilong OTDF i bin statim Samarai olsem wanpela sab-fil beis long kamap wanpela senta bilong givim rais sid i go long 14-pela Kiwaba Tras Viles bilong CMCA.

Tupela kain rais ol i traिम em: NARI # na NARI # 6. Tupela rais wantaim i save gro long strongpela na drai graun.

OTDF i sanap strong long ol toktok bilong NARI na ol fama bilong model viles i bin soim bikpela laik tru long groim rais



Rais plot long Samarai

long hap.

Rijonal Developmen Opisa bilong Saut Flai Japhet Bep i tok, "Mipela i traिम tasol na putim was long lukim sapos rais bai gro gut long Samarai. Na sapos em kamap gut mipela bai putim sid produksen senta.

"Taim dispela i kamap gut, plen bilong mipela em mipela i lukluk long milim na pekim long wan kilogrem peket na salim long Kionga, Tabubil, Daru na Balimo long helpim ol viles fama long mekim mani."

Moa long 100 kilogrem bilong

NARI # ol kisim olsem namba wan kaikai bilong traिम projek na ol i milim. Sampela bilong rais sid ol i putim bek long planim nupela na sampela ol i givim long ol komyuniti long boilim na traिम teist bilong Samarai rais projek.

Bihain long ol i teistim, ol i tok em i nais tru.

Dispela traिम projek i kamap gut na OTDF i tokim ol famili na grup long Samarai long gohet na klinim bus long olupela ples balus na planim moa rais.

Samarai Rais projek na ol sampela rais projek long Saut Flai i



Ol viles lain long Samarai i putim rais long masin long stretim na CEO bilong OTDF, Ian Middleton na ol sampela ples lain i lukluk long rais masin.

putim ol opisa bilong OTDF long na i lukluk long kamapim bikpela gutpela posisen long luksave na rais projek long 2015 na go daunim ol hevi bilong rais projek anatap.

# Madang Baiodisel projek kisim K2.3 milien helpim long gavman

James G. Kila i raitim

NESENEL Gavman i soim sapot bilong en long namba wan baio disel projek long Madang provins na i givim K2.3 milien.

Minista bilong Nesenel Plening na Monitoring, Charles Abel i bin givim K2.3 milien long Madang provinsal gavman long baim wanpela sip long sapotim ol rurel fama long salim kopra na kamapim baiodisel fiul long Karkar ailan long Madang provins.

Dispela em namba wan nupela kain projek stret we kopra bai kamapim disel long ranim ol kar long Madang provins.

Mista Abel i givim sek mani i go long Gavana bilong Madang Jim Kas, na i tok olsem gavman i laik wokim ol samting insait long kantri yet long helpim ol liklik fama long ples na dispela baiodisel projek long Karkar ailan em wanpela gutpela rot.

Dispela mani bai go long baim dispela nupela kain sip aninit long Nesenel Risponsibel Sastenabel Developmen Program long sapotim



Baio disel projek em gutpela nius long ol kokonas fama long Madang.

Madang baiodisel projek. Dispela sip em nupela kain stret we ol bai wokim long bihainim ol lain sistem bilong PNG.

Wanpela kampani bilong Holland nem bilong en Asia Ships i wokim dispela sip long

mekim wok insait long baiodisel projek na bai ol i lonsim long neks yia.

Mista Abel i tok dispela baiodisel projek bai sapotim ol kopra groa long Madang long kisim gutpela prais long

kopra na tu bai tanim kopra i go kamap disel na tu mekim kopra i kamap olsem disel prais.

Em i tokaut tu olsem dispela baiodisel bai mekim prais bilong disel i go daun-

bilong na bai helpim PNG Power long Madang na tu dispela kopra disel bai ol i yusim long ol kar bilong Madang provinsal gavman.

Moa long en tu, dispela baiodisel bai daunim ol smok

nogut i go daun olsem 90 pesen na dispela em gutpela long envairomen.

Minista Abel i tok dispela nupela sip em Madang provinsal gavman bai papa long en aninit long wanpela pablik-praivet patnasip wok bung.

Minista i tok dspela sip em bai ol i yusim long karim kopra na tu helpim ol pasindia i go olsem long Karkar, Bagabag, Long Ailan, Sairor na ol ples long Raikos.

Em i tok dispela projek em gutpela na smatpela piksa stret long go wantaim Nesenel Strateji bilong Sastenabel Developmen.

Minista Abel i tok planti taim kantri i save salim ol samting bilong en i go long ovasis long kamapim ol samting na bihain PNG i save baim gen. Dispela pasin i lukim kantri i salim wok bilong en na veliu bilong prodak bilong en i go long ol outsait lain.

Em i tok PNG i ken kamapim fiul ol disel bilong en yet insait long kantri na kamapim wok bilong ol lokal pipel.



# Freeway Bumpers winim NCD Gavanoas Kap

**FREEWAY** Bumpers i winim gen ragbi lig taitel bilong NCD Gavanoas Kap salens long las wik Sande egensim Hohola Six Knight wantaim 6-4 pons long fultaim. Dispela em namba tu taim bilong Freeway Bumpers long winim gen dispela taitel we i save kamap olgeta yia long Ipi Pak pilai graun long Hohola. Freeway Bumpers i kisim K10,000 na Hohola 6 Knights i kisim K5,000 olsem prais mani.

Gavanoas Kap salens i save kamap olgeta yia na ol tim save kam long ol kona kona bilong Mosbi siti long stap insait long dispela op sisen ragbi lig salens.

Dispela i bin wanpela strongpela na hatpela gem tru bikos tupela tim wantaim i putim was gut tru long no ken mekim ol mistek nabaut na tu traim long yusim wanem kain sans ol ken kisim long kamapim trai.

Olgeta difens na pilai i ron gut tru bihainim plen na ol stail bilong ol we i lukim fainel pons em daun stret long 6-4.

Freeway i laki tru long winim gem taim kik bilong Hohola 6 Knights i no bin go insait taim ol putim 4



pons long sko bot. Olsem na ol taitim difens na olgeta kona wantaim 2 pons go inap long fainel wisel i kraik long fultaim.

Pilai i kamap gut tru we i no gat trabel o kros nabaut maski i gat wanwan kros liklik tasol olgeta lain i stap wantaim wanpela tingting long pilaim gut gem bilong ol na pinisim gut long trupela spirit bilong gutpela spotman.

Pot Mosbi Vipers pilai Presley Soto i bin skorim dispela poin bilong Bumpers we ol i kikim na

kamapim 6 pons long namba wan hap bilong gem. Knights bin kamapim planti gutpela gem tru long dispela gem tu tasol ol kik bilong ol tasol i no painim mak we i daunim ol tekova long pons.

Tasol dispela i no daunim Knights we ol wok strong tru long olgeta seksen na sapot wantaim long lukim seken rowa Amula Aniaso i painim spes na go insait long kamapim 4 pons bilong ol. Tasol kik i no bin go insait na dispela i daunim Knights long fultaim.

Soto bin painim wanpela sans gen long kamapim narapela trai bilong Bumpers tasol referi tok no trai na dispela i kamapim sampela nois liklik long ol sapotas tasol gem i ron yet inap long fultaim.

Tupela Hohola tim yet bin mekim save long dispela gren fainel maski ol bin bungim bikpela salens i kam long ol boi long 6 Mail na Morata long dispela NCD Gavanoas Kap salens.

**Lukim ol eksen poto bilong NCD Gavanoas Kap salens long pes 27.**

## Soka long Papua Niugini

Wantaim Starlin Jawa

### Pot Mosbi Soka Asosiesen (PMSA)

Papua Niugini bai lukautim Pasifik Gems long dispela yia long Pot Mosbi na dispela bai givim sampela hevi long lokol soka gem long Bisnis olsem na mi ting menesmen bilong Pot Mosbi Soka bai lukluk raun long painim hap bilong ranim ol gems bilong PMSA. Wanpela hap mi ting em Gerehu Sekenderi Skul graun tasol em samting bilong PMSA na skul long toktok na stretim na toksave long ol klap. Bikpela samting em olgeta soka klap mas sapot wantaim PMSA menesmen long ranim gut gems long dispela yia. Soka politiks mas stap longwe tru long olgeta toktok na ron bilong gems na administresen bilong soka. PMSA bin stap ausait longpela taim long piksa bilong soka long PNG taim PNGFA bin saspending em na nupela menesmen aninit long lidasip bilong John Wesley bin mekim gutpela wok tru long kirapim bek asosiesen wantaim helpim bilong ol soka klap.

### Sapos nogat hap bilong PMSA gems

Sapos i no gat hap bilong PMSA long ranim ol gems bilong em, mi ting wanpela tingting em long larim PMSA i ranim tasol Futsal ana Seven soka long dispela yia. I gat sampela hap spes i stap long ranim Futsal na sevens soka. Dispela liklik soka gems i ken helpim ol pilai long kamap gut na develop long skils na teknik we yumi no save lukim tumas long PMSA soka. Dispela i ken helpim ol pilai long tingting gut long taim bilong pilai na save gut long wanem samting ol ken mekim taim ol i kisim bal. Long 2016 bai yumi inap lukim bikpela senis taim 11 asait tim gem i kam bek gen long PMSA.

### Bisini Soka graun – Senis long PMSA.

PMSA wantaim naispela soka graun na banis bilong em mas lukim olsem soka i senis gut tru go antap long sait bilong stendet na level bilong gem. Yumi no ken stap yet long olpela stail bilong soka yumi bin lukim pinis long PMSA. PMSA Amatsa Supa Lig mas senis. Sistem nau mas senis na traim kamapim Rijinol stail we 5-pela rijon tim mas kamap. Ol tim em Momase Amatsa SL FC, Niugini Ailan Amatsa SLFC, Hailans Amatsa SL FC, Papua Amatsa SLFC na ARB Amatsa SL FC.

Dispela 5-pela Amatsa Supa Lig FC inap go insait long Nesanel Soka Lig (NSL) isi tru bikos provinsel gavman bilong ol bai sapotim ol gut tru. Dispela bai yu lukim trupela Nesanel Soka Lig i kamap. Dispela tu ken givim

salens tu long NSL Klap sistem. Bihain long NSL gems i pinis ol tim bai go bek long nomol gems bilong ol na dispela inap kirapim trupela na strongpela soka sistem insait long PMSA.

### Senis long PMSA Menesmen

PMSA menesmen ma tingting long makim wanpela PMSA Futbol Komisina. Komisina bai makim ol liklik wokman bilong em long ranim ol gems na bisnis bilong PMSA soka. Komisina bai kamap olsem Seketeri bilong PMSA Bod. Komisina bai ripot stret go long PMSA Eksekutiv Bod. Mi bilip PMSA bai muv gut go long menesmen bilong soka insait long Pot Mosbi siti.

### PMSA Soka Akademi

Em bikpela samting long PMSA mas lukluk long kamapim PMSA Soka Akademi. I gat planti helpim i stap long kain projek olsem na em wanpela wok PMSA Futbol Komisina ken mekim. Taim Akademi i kamap orait PMSA mas toktok wantaim Spot Faundesens long opis bilong Foren Afeas Dipatmen na ol Foren Embesi olsem Jemen Embesi, Britis Hai Komisina na ol arapela long helpim wantaim Dairekta bilong Futbol Kosing long PMSA. Yumi no bin yusim gut ol Baileterol na Malti Leterol Agrimen we Gavman bilong PNG bin sainim wantaim ol dispela ovasis kantri yet.

### PNG Nesanel Mens Tim long Pasifik Gems

Nesanel tim bilong PNG bin kisim bikpela hat taim egensim Singapo na Pilifins. Mi ting dispela gem em bilong traim na luksave long ol pilai na kamapim fainel tim bilong PNG long Pasifik Gems. Mi ting dispela i no stret long wei bilong redim tim long kain taim olsem. Yumi mas gat 11-pela pilai i stap redi pinis na ol tasol mas pilai long dispela kain tes gems long Singapo na Filipins. Yumi inap kamapim gutpela risal long dispela mi ting. Gutpela moa em olgeta ovasis pilai bilong PNG mas stap insait long PNG Tim.

### Soka long Pasifik Gems

Mi no inap klia tumas wanem kain risal bai kamap long taim soka salens i stat long taim bilong Pasifik Gems. Yumi gat gutpela Nu Silan kosa olsem na PNGFA mas givim em gutpela sapot. Mi laikim em mas gat 11-pela fainel pilai pinis na givim ol trening na wanem kain tes gems ol mas kisim long luksave long ol yet na redi gut. Sapos olgeta samting olsem i kamap pinis, mi wanbel olsem PNG Tim bai kamap long fainel.

# PNG i redi gut long Pasifik Gems

## Yakam Kelo i raitim

NESENEL Trek na Fil Etletik skwat i redi gut na wetim 6-pela mun long stat P asifik Gems na PNG i lukluk long kamapim gutpela rekot antap long 15 gol medol ol bin winim long Noumea long 2011.

Etletik PNG presiden Tony Green i tok dispela em isi long kisim bikos ol bin redim olgeta spot manmeri bilong kantri long tripela krismas i kam nau. Em bai hat liklik tu bikos arapela kantri tu i bin redim ol spot manmeri bilong ol gut long kam long dispela gem tasol PNG tim bai sanap strong wantaim na lukim olsem olgeta lain i kisim gutpela sapot.

Green i tok APNG nau i gat 85 trening skwat ( 50 man na 35 meri). Ol bin skelim gen dispela skwat long PNG Gems wantaim sampela nupela spot manmeri olsem Timothy Maggie long javelin, Martin Orovo long 1500m na Rama Kumilgo long stiplises. Green i ting bai ol kamapim fainel tim wantaim 65 na 70 lain long PNG tim.

PNG bin go pas long resis bilong ol meri long hadol na riley long Pasifik Gems we

Toea Wisil, Betty Burua na Sharon Kwarula i go pas long tim na Donna Koniel wantaim nupela sta Miriam Peni tu bin soim gutpela rekot long 2014. Ol meri bai wok strong gen long holim namba wan spot bilong ol. PNG bai wok hat liklik long ol long distens ran tasol mipela inap long winim sampela medol long dispela resis. Sans bilong ol long winim medol bai bihainim wanem kain salens ol bai bungim na program ol bai stap long en na sapos ol samting i kamap gut bai ol meri PNG inap long givim gutpela salens long ol meri Nu Kaledonia. I gat sampela Pasifik Ailan meri we ol save ron long Amerika resis long ol 1500m na 5000m olsem Astrid Montuclard bilong Frens Polinesia na Christina Wicker bilong Palau, Presiden Green i tok.

Em i tok long sait bilong ol meri long jam na heptatlon grup i kamap gut na strong nau we i no olsem bipo olsem na PNG i lukluk nau long makim tripela meri long dispela tupela salens. Nellie Leslie na Delilah Kami i sanap klia pinis long levelim Rellie Kaputin long hai jam na ol inap kisim gutpela moa

trening long Australia we olgeta samting bilong trening na gutpela kosa i stap. PNG i sanap gut tu long tripol am we Nellie Kaputin na Betty Burua i inap long brukim nesanel rekot bilong Angela Way. I gat sain olsem Nu Kaledonia i no inap mekim gut long sait bilong tro salens we ol save winim i kam we Sharon Toako i holim rekot long Pasifik long 2014 long javelin. Tasol ol rekot save senis olgeta taim long Pasifik Gems taim ol nupela spot manmeri save kam insait long piksa.

Rekot bilong ol man long 400m na 400m hadol i sanap gut long sait bilong PNG wantaim tu lokng 4 x 400 m riley. Salens long 400m resis bilong ol man bai stap han bilong Nelson Stone husat i holim rekot long dispela resis insait long Pasifik Gems. Tasol ol sampela yangpela blut tu i soim sain bilong winim dispela resis olsem Theo Piniau, Kaminiel Matlaun, John Rivan na Kevin Kapmatana.

Banuve Tabacaucoro bilong Fiji i holim yet rekot bilong 100m na 200m na Fiji bai soim strong tu long winim 4x400m riley resis. Tasol em hat long lukdaun

long ol PNG bois long dispela salens bikos long rekot PNG bin mekim long 1991 PNG Gems, Green i tok.

PNG nau i gat bikpela skwat long midel na long distens resis na dispela inap kamapim sampela top ana bilong PNG nau insait long ol liklik trening ol wok long kamapim stap. Green i makim olsem 1500m resis bilong ol man bai PNG i kisim we yumi gat George Yamak, Andipas Georasi, Vehermey Babob, Skene Kiage, Simbai Kaspar na nupela blut Martin Orovo long winim dispela taitel. Dispela skwat i stap nau long Goroka NSI long trening na lukluk long go daun long Australia long neks mun salens.

Green i tok long sait bilong tro salens, PNG i lukluk long Debono Paraka (diskas na sot put), Albert Karo (sot) na Timothy Maggie long javelin salens. Ful ripot na rekot bilong PNG tim bai kam aut bihain taim PNG Olimpik Komiti i lukim na glasim pas-taim. Dispela program bai karamapim ol salens long Kwinslen Sempionsip long mun Mas long Brisben na Osenia Sempionsip long Kens long mun Mei.



## Lionel Messi i no toktok gut long soka

LONG Mande em stat long bihainim Chelsea soka klap bilong Ingran. Na bihain olgeta soka manmeri long wol i go longlong nating.

*He's unhappy!*

*Em i no amamas, em laik lusim. Em bai no inap go long Real Madrid na Chelsea em klap we i gat innteres na i ken baim em. Olsem na em mas Chelsea yet. Em Anjentina wol soka sta ol kolim Lionel Messi.*

Messi em wan man klap we yu no inap skelim em wantaim ol arapela biknem na milien dola soka sta insait long wol long bipo na tude. Nau ol ripot i kamap olsem Messi i no amamas tasol husat inap save long dispela bikos Messi i no bin toktok wantaim wanpela man long wanpela samting. Em bin sem taim em kamap long Spein we ol wan pilaia bilong em ting em mas wanpela maus pas man.

Tasol olgeta samting i no ron gut long Baselonia. Nupela menesa Luis Enrique bin soim nupela stail long em mas stap longwe ol lain bilong toktok planti. Long Sande Barca bin lusim namba tri gem bilong ol long dispela sisen. Messi bin stap risev. Long Mande em no bin go long trening we ol tok em gat bel pen.

Nau long las Novemba dispela 27 yia soka sta bin tok olsem em i no klia sapos em bai stap yet wantaim Barca o lusim. Em bin kros long sampela kain takis ripot bilong em.

Tasol dispela em sampela kain plen o pasin bilong Messi long traim lusim klap. Dispela top soka pilaia bilong Ajentina bin strongim klap long tupela yia nau we em gat kontrak long stap inap long 2016. Wantaim nupela kontrak em bin sainim long las yia, em bai stap inap long 2019 we rekot mani ol baim em i sanap long \$300 milien dola winim mani mak bilong Cristiano Ronaldo na Gareth Bale bilong Real soka klap.

Skelim tu olsem Messi em wanpela top pilaia we ol no save senisim em isi long tim na tu klap i no inap kisim ol nupela pilaia i kami nap 2016 bikos klap bin brukim lo long kisim ol pilaia we krismas bilong ol i anit long mak bilong pilai insai long wol rekot soka salens.

Olsem na em i no toktok gut wantaim ol pilaia na menesmen i soim olsem nogut em laikim sampela gutpela samting o i laik mekim sampela samting.

**Ol top soka pilaia wantaim bikpela pei. Lionel Messi \$300 milien**

PLANTI top soka lig insait long wol i wok long painim ol gutpela pilaia long baim nau bihain long lis bilong ol top soka pilaia wantaim bikpela

pei i kam aut long soim husat em bikpela pei man insait long wol.

Lionel Messi bilong Barcelona soka klap long Spein em top pilaia we pei bilong em i antap tru winim olgeta pilaias long wol tude we pei bilong em i sanap olsem \$262 milien.

Na dispela em olsem mak tasol long kisim raits long dispela top yangpela Ajentina soka pilaia ya. Sapos wanpela tim i laik grisim Barcelona long salim Messi, orait dispela klap mas stretim nupela kontrak wantaim em.

Ripot i tok Messi i bin mekim moa long \$50 milien long wanpela yia wantaim kontrak em gat nau wantaim Barca soka klap long Spein. I gat planti ekspensiv soka pilaia i stap long Not Amerika, dispela sait bilong wol long Spein i ken karim dispela pilai kam long balus na peim em klostu \$262 milien long raits na bihain givim em \$50 milien dola long wan yia pei.

Ol i skelim pei bilong Messi bihainim ol samting olsem trense fi long 2009 i kam, gem bilong em long tude, krismas bilong em, posisen bilong em long gem, kontrak em gat nau na tim rekot.

Jenuari em taim bilong ol list na rekot bilong olgeta pilaia bai kam aut klia nau we ol top soka klap insait long wol bai lukluk long painim na baim ol pilaias bilong ol.

### Hia em top 10 list bilong ol pilaia na pei bilong ol:

Lionel Messi, Barcelona (Spain) — \$262 million (€220 million)

Cristiano Ronaldo, Real Madrid (Spain) — \$158 million (€133 million)

Eden Hazard, Chelsea (England) — \$118 million (€99 million)

Diego Costa, Chelsea (England) — \$100 million (€84 million)

Paul Pogba, Juventus (Italy) — \$86 million (€72 million)

Sergio Agüero, Manchester City (England) — \$77 million (€65 million)

Raheem Sterling, Liverpool (England) — \$75 million (€63 million)

Francesc Fàbregas, Chelsea (England) — \$74 million (€62 million)

Alexis Sánchez, Arsenal (England) — \$73 million (€61 million)

Gareth Bale, Real Madrid (Spain) — \$71 million (€60 million)

### Ol spot sta ken kamapim bagarapim

OL biknem spot pilaia em ol save kolim ol sta o supahiro insait long wol tude. Amas pikinini insait long Saut Oklen i save driman long kamap Shaun

Johnson?. Amaspela windua i bruk long ol stua na haus long Mumbai bihain long ol pikinini wok long tromoi ston na paitim bikos ol laik kamap olsem biknem kriket pilaia long wol olsem kolim Sachin Tendulkar?

Yumi lukluk insait long rekot bilong ol biknem spot lain na wanem kain rekot ol save kamapim. Taim ol win, yumi kalap na amamas na taim ol lus yumi krai. Ol dispela biknem spots sta o hiro em planti pikinini save bihainim ol klostu tru. Olsem na ol save kisim bikpela pei na slip long ol traipela haus na gat traipela bisnis. Bikpela samting em yumi laikim olsem ol dispela biknem spot lain mas soim gutpela piksa long ol pikinini long lukim na bihainim tu.

Taim yumi harim nius bilong Russel Packer bin pinis long kalabus bihain long 12-pela mun long pait, mipela stat long pilim no gut na kros bikos dispela man i gat nem long pilai ragbi tasol em laik brukim het bilong narapela man long Sidni long rot. Taim em bin kisim sas na go long kalabus, papa bilong em tok lo i mekim hat tumas long pikinini bilong em. Ol lain long Nu Silan tok sas ya i liklik tumas tasol ol ting olsem bikos Parker em biknem spot man, lo i isi liklik long em.

Olsem na ating Packer bai traim gen NRL ragbi lig gen we yumi save olsem olgeta man na meri mas gat namba tu sans long stretim ol yet long laip.

Packer bin pilai long NRL wantaim Warriors tim na em bin mekim planti bikpela senis long gem we planti lain save laikim em na bihainim gem bilong em. Em bin sainim wanpela bikpela kontrak tu wantaim Newcastle Knights tasol em laik raun raun long Sidni olsem em wanpela spesel man taim em mekim trabel.

NRL save toktok planti long ol wok na pasin ol pilaia mas mekim insait long komyuniti long soim gutpela piksa na skul long ol arapela. Dragon save werim ain man siot long las yia. Olsem na sapos Packer i gat sans long joinim St George yu ken tok olsem dispela top Kiwi pilaia i senis tru tru o no gat.

Mi bilip long seken sans tasol ol trabel lain olsem i no ken go bek long mak na level ol save long en bipo bikos long bagarap ol kamapim pinis long sapot na interes bilong ol manmeri husat bin sapotim em long bipo.

I gat planti gutpela ragbi lig sapota husat save tromoi bikpela mani long go lukim gem ol save laikim na sapotim tasol ol kisim bagarap long kain piksa na eksen nogut bilong sampela pilaia husat mekim ol bikpela trabel olsem.



KRIKET: Chris Rogers i stap yet long senisim David Warner. Tasol lukaut long stail gem bilong ol.



ESIEN KAP 2015: Faiv pela strong pela sta husat inap kamapim bikpela wari long tonamen.



BRISBEN INTANESANEL: Marinko Matosevic i kisim bikpela nokaut long han bilong Steve Johnson.



**IMPROVED TASTE!** Niupela teist wantaim planti mit na oil. Teistim na bai yu laikim moa yet.

# DIANA

Tuna

Emi tuna  
 bilong PNG



Moa mit na  
 oil insait



Manufactured by:



RD Tuna Canners Ltd.



TUNA IN OIL

## SP Breweri i tokaut long 2015 Spot Awot

**Joylyne Karato UPNG sumatin i raitim**

**OL spot man na meri husat i gat bikpela luksave long wan wan spot bai winim mani mak olsem K35,000.**

SP Breweri i amamas stret long tokaut long namba 22 Spots Awat we em i luksave long ol spot man na meri insait long kantri.

Long taim ol i tokaut dispela Awat, PNGOC Seketeri Jeneral, Auvita Rapilla i tok olsem het tok bilong dispela Awat em "yia bilong yumi".

As bilong dispela em olsem bai yumi givim Awat long ol spot man na meri meri bilong yumi, tim bilong yumi, na ol koas o treina bilong yumi.

Em i tok las yia 2014 em i wanpela gutpela yia we yumi winim tupela gol medal long komonwelt gems na tu ol SP Hunters winim Quinslan Kap.PNG tu i soim kala bilong em long PNG gems long Lae.

Long dispela yia, wanpela nupela Awat ol i kamapim em Pipel Sois Awat we pablik bai makim husat spot

man o meri ol i ting bai winim prais long dispela yia SP Spots Awat.

Mis Rapilla i tok em i amamas long ol narapela ol sponsa bilong ol Awats we i mekim dispela SP Awat i kamapim luksave bilong ol spot man na meri na ol ofisal.

Dispela kain samting ino bilong apim nem bilong ol spot man na meri tasol em i ken helpim ol liklik pikinini bilong yumi long kirapim tingting bilong ol long pilai spots long bihain taim.

Spots Minista Justin Tkatchenko i tok em i amamas long SP Breweri long luksave bilong em na em i tok olsem ol tu i mas luksave long ol hatwok ol menesmen na ogenaisesen i putim long kamapim dispela kain bung.

SP Breweri HR na Kopret Menesa Reg Monagi long han kais na PNGOS Seketeri Jenerel Auvita Rapilla wantaim Spots Minista, Justin Tkatchenko long hansut long taim ol i tokaut long 2015 SP Spot Awot.



**Ideal Gift pack**



**Big range of perfumes and aftershaves available.**

*Good Products, Better Prices, ikam long*

**Johnstons Pharmacies Ltd**

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg